


人海記

海寧查悔餘纂

辛卯浴佛日荅汀病枕署檢



人海記卷上

海寧查慎行悔餘纂



蘇子瞻詩云惟有王城最堪隱萬人如海一身藏與東方曷倩陸沉金馬之意寄託畧同余自甲子夏北遊太學又九年舉京兆秋試又十年唱第南宮其後供俸奉內廷者七年從事書局者三年迨癸巳夏移疾乞歸年已六十有四矣通計三十年來客居京師歲月過半其間耳目聞見隨手綴錄零丁件系不下數百條雪窻檢點裒集成卷命曰人海記

本朝初年滿洲官員支俸不支薪漢官則俸薪並支順治

甲午停秋冬二季俸有以停俸不停薪請支折薪銀者以薪侈于俸也如四品官季給薪三十金俸纔二十金耳內院不許謂滿洲方在此論俸何得濫也明年漢官但給俸不給薪矣朱右君司空云

故事舉行計典後臺省例有拾遺順治丙戌部院大計羣吏止據撫按所揭以黜陟臺省欲循故事內大臣不欲也陳深陽力主之臺省拾遺奏上多被反坐己丑大計鑒前事雖有糾拾亦僅耳其後遂停吾邑楊少司馬為副憲時復請舉行拾遺格于部議不果督撫之權漸重矣內閣判日俱用墨筆以票旨硃筆避尊也此制起于明朝

但外而九列至斗食之例吏皆硃批獨不嫌僭上何也

八旗官兵內城分駐之地 國初各有地界正黃旗則正陽門鑲黃旗則東直西直二門正藍旗則宣武門鑲藍旗則崇文門正紅旗則德勝門鑲紅旗則阜成門正白旗則朝陽門即齊化門鑲白旗則安定門

漢大太官園種冬生葱韭菜蘊茹晝夜燃蘊火待溫氣乃生事見漢書召信臣傳今都下早蔬即其法蓋明朝內監不惜厚直以供御庖嘗聞除中夕市中有賣王瓜二枚者內官過問其價索百金許以五十金市者大笑故噉其一內官亟止之所餘一枚竟售五十金而去

吾鄉呼林檎為花紅北人呼為沙菓又柰似林檎而小北人目為虎刺檳

北方無笋惟冬笋用茅竹筒封貯從江南馬上販鮮十餘日到京每斤價值四五百錢春夏之交食蘆薈蒲牙總名為笋詩云維笋及蒲則笋與蒲故當有別

佐領即牛录也秩如明朝千戶專管戶籍秩雖卑凡位居公侯伯者並俯聽其派撥亦猶縣令之轄鄉紳

滿洲八旗騎兵月餉七兩五錢步兵三兩四錢綠旗騎兵月二兩步兵一兩五錢城守兵月一兩水師同途月小盡扣銀五分謂之朋椿官馬斃則以此項買補凡騎兵止給

官馬鞍轡自備

滿洲子弟入學倡于順治辛卯壬辰時范文程當國初試百四十人八庠歲考止三等上者賚絹二疋其赴科舉初場止二義廣寧楊方興山陰沈文奎並解元麻勒吉為狀元另為一榜戊戌以後乃列名漢人榜間亦有成七義者矣

初徙八旗圈順天永平保定河間之田凡腴畝善宅悉歸旗下謂之莊子順治癸巳以水災四府莊子俱荒欲改圈真定順德廣平大名地戶部持之不行

溧陽相國以甲午三月賜死時年五十宣武門內靈官殿

乃杜郵之地也

陝西織造絨褐本朝初年設有專員順治辛卯始省以此項錢糧充餉

世祖章皇帝於甲申十月朔入燕甫七歲是日一御殿自後元旦萬壽節俱免朝賀至庚寅正月朔始御殿受賀

順天鄉試初用考試官四員內滿洲二人主八旗蒙古應試者後止二員並用漢人

滿洲編檢視漢官俱晉一品而於滿人為卑以滿官止七品也

吏兵二部每月選期舊于天安門外兩廊設矮几鋪紅氊

席地而坐尚書二人正面吏部西向兵部東向侍郎旁列其餘司官筆帖式以次排比選人于前唱名掣籤今兩廊列牆屋各官俱露坐

順治甲午正月始頒文武諸臣制誥封贈八旗勲衛數萬人其祖父之名類皆闕失意不欲制詞漢官力爭之於是內院擇坊局史官十六人分撰自一二品始一品限十二句二品十句三品八句句各四字不用故實

順治癸巳三月廿五日改鑄朝鮮國王印兼滿漢文以從前止漢篆也

出繼之子離任為本生父母治喪自北平朱右君

諱之

先

生始先生時官戶部侍郎其後大臣遂援為例

西洋人生日不論本誕如立春日生其日無定期或十二月或正月遇此節即是也

回回人雖在中國不奉正朔自有回回歷亦不限十二月為一年別有歲朝每年不同己丑八月初三日為羣聚慶會之期余在都下親見之

皇城西苑萬歲山上以西僧言建白塔三層形如瓶按元世祖至元二十八年五月丁巳從楊璉真伽之請于臨安建白塔二各高一丈二尺以居呪師朵四的姓吉等七人其事本此

四川開科始順治辛卯解額七十一人喪亂之後舉子止二百餘人主司駐保寧寓試道士院時有亭溪之警急於竣事二三場併日

開河舟阻官舫於總河處求給讓行牌以先商賈今無此例矣

永城人宋獻策明末賣卜燕市遇李自成拜國師導之入都自成敗後滿洲重其術隸旗下其人至康熙初年乃死南京後湖貯各省戶口田糧冊有明終始計一百七十萬本南渡後用以造甲點火藥至本朝僅存萬歷間及崇禎五年者朝議謂每本重四五斤鬻之可得四五萬緡

貢士閱落卷自順治乙未始時禮科議南卷十中其一而江西僅七人物議藉藉於是大總裁金之俊等奏落卷貯于順天府許貢士赴閱限六日內不得領回前此未之聞也

翰林外轉順治乙未九月始行之編檢則范周沈荃盧高湯斌耿介崔之瑛馬燁魯等少詹以不開坊以上則黃志遶楊思聖王舜年藍潤王元谷陳煥等共十八人皆以品行清端才猷瞻裕各照外轉應得職銜陞一級遇闕即補康熙戊辰編檢汪楫丁廷樵李濤三人以知府用辛未冬少詹徐潮轉通政司侍讀胡會恩轉光祿少卿侍講熊賜

瓚轉大理寺丞高喬勵杜訥俱轉通政叅議官坊李應爲轉太常少卿周清源轉叅議司業吳涵轉叅議

世祖嘗言明朝之亡由周延孺馮涿州少子娶宜興從女初頗為解上不以為然又問延孺有子官翰林今安在銓詭對曰庶吉士周奕封非延孺子也時奕封請假在籍乙未秋還朝俄除知縣乃涿州希旨外之也

各鎮總兵官銜帶都督同知或或事在朝朝有五軍都督府故也今都督府已裁而總兵仍兼此銜甚屬無謂

正陽門外窮市有古鐵長三尺許衡二寸形若草帶中虛外繡面背隱起釘如故不甚可辨一日高麗使見之售以

五十金云此定水帶也禹治九州作九帶此其一也若航海之水鹹不可飲以帶投之立甘冽故貴耳市中好事者隨至會同館汲若水石石餘投蓋數斤揉之使濁乃投帶于中沸涌作魚眼數十少頃味極甘冽明季事
大學石鼓文舊六百五十七字元至元中存者三百八十六字今所存字但三百二十五而已

西山碧雲寺俗名于公寺寺後為正德間大瑞于經墓土木華麗凡賜祠五多祔家家中央豐碑二道正面無文其碑陰詳刻魏忠賢爵里姓名意殊駭詢之守僧云忠賢名下蘇應宣或云九思葛嘗被掠于建州從本朝入燕葬其衣冠于

此余憤甚直前渡之時與朱大司空同遊公不以我為狂也。按碧雲寺忠賢重修天啟三年少師葉向高撰記禮部尚書會稽錢象坤篆額今碑磨去錢象坤姓名意作相時事也福清記中亦頗稱許魏氏

香山永安寺來青軒額明神宗手書軒之前有山突起金章宗發祭星臺也下有護駕道松覆之稱護駕松今尚存其一

弘光寺在香山絕頂永樂間太監鄭和建和朝鮮人四使本國中有佛閣形圓而入觚云東國之制去香山二里許為鮑公寺亦內官墓中有白松八株圍皆

三抱掩映殿宇人行其下衣上不見日色

盧師山清涼寺中秘魔崖古栢一株長可尺許橫出石縫不凋不榮云盧師手植也石經山亦有古栢一萬歷初上過之御書臨根古栢四字

大功德寺舊名護聖寺直金山口與景陵相近宣德朝雪峯大覺禪師駐錫于此宣帝御賜詩當年天下選高僧獨取尊師第一名即指雪峯也園陵自景皇帝外又有懷猷悼恭哀冲莊敬憲懷猷懷悼懷故大子七衛許忻申蔚岳景頴戚薊均靖邠簡懷悼故王十六殤主二十六仁宗妃三宣宗妃一英宗妃憲宗妃十二按史皆葬金山與景陵

相屬凡五十三園今不可別識矣

吾邑談孺木先生留心明朝典故不以詩名然其北遊集

中如遇文信公祠七律一聯若云丞相宜全節敢謂書山

合出山過陳溧陽里第云往事恩仇虛偃月新編賢否總

銷魂陳餘刎頸交何在范蠡扁舟事可行過惠安伯張氏

墓云翁仲似人能化石杜鵑本鳥不離枝贈王玄照太守

云縱馬青山非舊日翠微雲亂夕陽中過梅村先生值金

壇王友三感舊云衣冠王謝多何益門戶胥原大可憂南

宋朝廷多覺小中原經濟亦誰曾贈易道末太常云休屠

祭後全非像博望歸時不待槎除夕云春魚臘月人歸少

寒倍燕京客受多如此之類皆名句也

吏部楹帖明萬曆初冢宰錢唐張瀚立功名身外事大就何妨小就何妨富貴眼前花早開也得晚開也得

西洋畫以胡桃油漬絹抹藍或綠或黑後加采烏不用白地

海運道里詳梁太宰夢龍集中自淮安府至安東縣九十里安東至馬洛関五十里馬洛至蘆浦四十里蘆浦至楊寨四十里楊寨四十里楊寨至白沙関二十里白沙至雲梯関二十里雲梯至淮河套六十里淮河套至大海東洲山百二十里東洲山至高公島三十里高公島至鷹游山

三十里鷹游山至盧溝所十五里盧溝所至青口六十里青口至興莊五十里興莊至東流所百里東流所至濤落場三十里濤落至信陽場百二十里信陽至齊堂島四十里齊堂至靈山島九十里靈山島至竹槎島五十里竹槎島至浮島四十里浮島至灣島六十里灣島至鰲山管島三十里管島至田橫島七十里田橫島至欽島十里欽島至青島百二十里青島至海洋所灰島七里灰島至炕兒島十八里炕兒島至玄城島百廿里玄城島至雙駝埠二十里雙駝埠至寧津所八十里寧津所至成山衛五十里成山至青鷄島六十里青鷄至羅山所五十里羅山至

威海衛四十里威海衛至劉公島五里劉公島至寧海州
七十里寧海至空々島五十里空々島至竒山所三十里
竒山至福山縣三十里福山至登州新海口八十里新海
口至沙門島六十里沙門至桑島五十里桑島至萊州岫
岫島四十里岫岫島至三山島八十里三山至芙蓉島五
十里芙蓉島至海倉百里海倉至魚兒舖十里魚兒舖至
白浪河五十里白浪至八溝河五十里八溝至小清河二
十里小清河至清河五十里清河至絲網口十里絲網口
至江空河十里江空至大口子四十里大口子至大清河
十里大清河至唐頭寨十里唐頭至小沙河五里小沙河

至渾水汪十五里渾水汪至降河三十里降河至久山河
十里久山至大沙河二十里大沙河至泊油河十五里泊
油至套河十五里套河至沙頭河十里沙頭至大溝河三
十里大溝河至桑向河三十里桑向至徐家溝十里徐家
溝至乞溝河七十里乞溝至大沽河二十里大沽至天津
衛百五十里天津至張家灣八十里通計淮安至張家灣
海道水程共三千三百九十里
隆慶辛未海運初雇海鵬船五隻分載米二千石每駕舡
十二人自淮安至天津試運無碍海道灣泊舟行停泊宜
在舊設墩上畫樹旗幟夜懸燈籠以便趨集嘗攷平江伯

陳瑄督海運于靈山建烽火臺高三十餘丈今宜師此意
多為標識云素林雜組

明官制一書不載翰林院庶吉士蓋官制定于洪武年間
而庶吉士則始于永樂二年甲申也似宜補入按永樂二
年三月己酉選庶吉士楊相等五十人並習文湯流王英
等十人並習書四月甲申進士沈升等俱改庶吉士修書
五月辛丑諸司辦事進士能書者曾慎等二十九人為庶
吉士一科凡四選

崇文門外二里大通橋東園舊泰鹿處地平如掌湯衍可
數里名鹿園

寶坻銀魚似吳中繪殘而大倍之出海中舡山下霜降後
泝流而上育子諸浣坑中夏霧映日波浪皆成銀色土人候
其至網之瓦窰頭出者尤佳明朝命內監提督冬月抱子
以冰追進縣設六廠漁戶一百七十人歲進凡七次
蘆溝橋石獅兩行共三百六十八

石經山在房山縣西南四十里生懋題草他處所無
長平公主崇禎周后所出甲申春年十五議降周太僕其
子世顯將築館遭國變帝以御劍斫右背斷腕賊以貴主
已殞授尸國戚五日復甦順治二年公主上書願皈依空
門上不許詔求原配周世顯應詔起即故武清侯之第賜

金錢牛車庄註一區田若干頃俾成禮時乙酉六月上浣也
明年丙戌八月十八日薨年十七詳華亭人張晨記事及
吳梅村集中孫侍郎春明夢餘錄則謂公主甲申年十五
傷右臂肩際明年乙酉九月成婚丁亥卒年月互異不知
孰是

華亭王圻續文獻通考藝文類中載琵琶記樂府水滸傳
又明朝宗室鄭越襄荆淮滕梁衛八王并仁宗子而云成
祖子其誤尤甚

京城各巷曰某衚衕其義無所出謝肇淅湖五雜俎曰閩中
方言宮中小巷謂之弄南史東昏侯遇弒於西弄即巷也

元朝經世大典謂之火衕後因訛為衕衕

惠世揚米脂人萬曆甲辰進士歷刑部侍郎李自成故牧
卒也常給事世揚之家及僭號語人曰得惠先生來則甚
幸因致書世揚即至拜右平章事時左平章則牛金星也
自成敗後●本朝兵入燕三年不見用後放歸綏德副總
兵王永強作亂劫世揚從軍敗于米原鎮永強自縊世揚
不知所終棗林雜俎

北京戶部節慎庫金銀元寶各一蓋鎮庫之物以梯登其
上其邊尚高于人上刻永樂九年

左蘿石懋第北使被幽留都信隔至攝政王使人宴左

侍郎飲酣語曰此太平宴也左問所自曰江南破矣左悲
不勝什席于地作絕命詩閏六月十八日遇害都人吳某
收殮同時被難者五人其一則兵部司務加職方主事崑
山陳用極也素林雜組

姚廣孝謚恭襄初從祀太廟嘉靖中移祀大隆善寺故元
崇國寺也今斥為馬廐

崇文門內舊有于忠肅公祠萬歷乙未二月己未勅建額
曰忠節本朝順治中公之像旁被毀吾邑人談孺木作吊
于太傅祠文以憫之今相傳為京師城隍神

江寧靈谷寺琵琶街側有池曰八功德水今涸按八功德

水見佛書在天竺國一清二冷三香四柔五甘六淨七不
噎八除病

各省俱有陽泉湯直隸十三江南十三山西十一山東十七
河南十陝西十四江西十七湖廣十六四川八福建六十
一廣東十五廣西三雲南十八浙江三貴州二大抵其下
有白礬丹砂硫黃三物乃蒸為煖流後周王褒溫泉銘云
白礬上徹丹砂下流明廣陵素喬云雷火所灼其氣亦硫
蓋極陽之氣也

明朝諸陵孝陵在應天府朝陽門外鍾山懿文太子祔葬
于側曰東陵長陵在昌平州城北天壽山自紅門進御道

凡二十里餘舊名東祚子山永樂七年卜建改名天壽後
視高十數十重來龍跌斷明堂平潤祔葬十六妃獻陵在
長陵右祔葬四妃景陵在長陵左祔葬七妃裕陵去昌平
二十五里獻陵之西祔葬十八妃茂陵去昌平二十七里
裕陵西北祔葬十四妃秦陵秦在茂陵西無祔康陵去昌平
三十五里泰陵之西九龍池環其前永陵去平昌十八里
長陵之東南兵部侍郎餘姚駱用鄉鄉所擇祔葬妃三十嬪
二十六昭陵定陵在大峪嶺徐尚書學謨所擇時通政叅
議梁子琦等難之為輔臣申時行王錫爵所斥崇禎初尚
書姚思仁督理多朽石吾邑陳與交以給事中巡二宮壽

宮五室中三間待馭四隅維以鉄索各大銅缸注油左右
室通門侍中宮及嗣帝所生母升祔神廟閱壽宮自坐石
室飲酒慶陵德陵石橋高不五尺長不五丈砌石無多而
耗二十萬金且陵地窄甚僅當兩山之腋在永陵左沙相
距不百步也思陵在紅門西三里與諸陵隔河諸陵在河
北思陵獨在河南即故皇貴妃田氏園諸陵明樓俱有碑
題某宗皇帝之陵稜恩門內有碑俱無字閉以木柵本朝
入關惟定陵猶被燬餘仍令太監守護康熙二十一年添
設守備一員

皇城北苑中有廣寒殿相傳遼后梳粧樓成祖定鼎北京

勿毀以垂鑒戒萬歷七年五月四日樓傾梁上金錢百二十文云至元通寶則樓初于元初非遼時物矣張江陵雜著涿州素乾河中有塔名鎮河嘉靖元年塔崩內有古錢皆飛空如蝶自後河水不時泛溢涿州志

都御史葉盛巡撫宣大於沿邊孔道俱設煖舖即唐人邊舖也

薊州水廠明季已有之凡十六所本朝兵始至問廠何為曰藏永者謂伏兵也焚其五始悟

一品榮歸日雙親未老時嚴文靖公堂聯無毀無譽三代直道而行知止知足四時成功者退申文聯財不求贏敢為子孫益

過位嘗踰分當思齒角難魚陸五臺聯觀此足見盛世縉紳氣象

沙河縣宋文貞公璟碑斷沒土中正德丁丑縣令方思道治鉄二百斤貫而續之今尚存不甚剝蝕德清談未庵宰此邑曾以榻本見貽

保定有定霸城宋楊延朗所築金時以其磚他用其土基尚存嘉靖中霖雨潰城西北隅得人骨數十具植立土中髑髏各戴兜鍪旁倚兵仗石刻云活築惰工百戶徐瑾一行兵役見者竦然長安客話

成化初韓襄毅雍南征平大藤峽賊斬大藤中空鞞草為

鼓置叅府前聲震數里兵使其移于行臺扣之無聲移歸故處聲復鳴

京師皇城內西苑古檜一松四并金時植嘉靖中封松為指揮使其俸米專飯孤貧

國子監文廟古栢並元許文正公手植

京師外城天壇拘榆錢凡榆春錢獨天壇之榆錢以秋報國寺舊有矮松二株其右尤奇幹長不過數尺而枝橫數丈文人往々觴詠其旁自內城々隍廟市移于此每月三度為掃馬之具數年來無復存矣

槐樹斜街即土地廟斜街舊時古槐夾路今每月逢三日

日為市集槐亦僅有存者

昌平州天壽山古槐相傳竇禹鈞家物樹中朽可布三五席稱竇家槐按禹鈞周之諫議大夫也故居在薊州城東今其地尚有竇氏莊

涿州西南十五里樓桑村昭烈故居按本紀道右有大桑高十丈如羽葆乙丑二月同楊嵩木游此覓土人為向導至則頽垣破廟問所謂樓桑無能指其處者廟創于唐乾寧五年先主像與關張並列

三峽產雲南稗一名鷹爪稗播種畦植與五穀爭價他處所無也

遼陽東二百餘里山深林密不見日色下產人參其苗高出百草之上採者以夏五月裹糧披榛而入或迷徑為虎狼所噉或人相遇弱者聞死强者攫所有而出以地近皇陵恐傷龍脉通者挖參之禁甚嚴罪至誅死而趨利之徒輕生不顧也

大內多異物歲一閱視出之于廷有瓜子長五六寸潤如之不知何地所產袁貴妃父祐說見楊士聰玉堂薈記

旱金蓮花五臺山出瓣如池蓮較小色如真金曝乾可致遠初友人自山西歸有分餉者以點茶一甌置一朵花開沸湯中鮮新可愛後從出古北口外塞山多有之開花在五六月間一入秋莖株俱萎矣

各省歲貢芽茶共四千二十二斤內江南宜興縣百斤六

安州三百斤廣德州七十五斤建平縣二十五斤浙江長

興縣三十五斤即南茶嵯縣十八斤會稽三十斤永嘉十

斤樂清十斤臨安二十斤富陽二十斤慈溪二百六十斤

宋置茶局進貢元明因之麗水二十斤金華二十二斤龍游等縣共二

十斤臨海等縣共十五斤建德五斤淳安五斤遂安壽昌

二縣共六斤桐廬二斤分水一斤江西南昌府七十五斤

南康府二十五斤贛州府十一斤袁州府十八斤臨江府

四十七斤九江府百二十斤瑞州府三十斤建昌府二十

三斤撫州府二十四斤吉安府十八斤廣信府二十二斤

饒州府二十七斤南安府南康縣十斤湖廣武昌府六十斤岳州湘陰縣六十斤寶慶府邵陽縣二十斤武岡州一十四斤新化縣十八斤長沙府安化縣二十二斤寧鄉縣二十斤益陽縣二十斤福建建寧府建安縣一千三百六十斤內探春二十一斤先春六百四十三斤次春二百六十二斤紫笋二百二十七斤薦新二百一十斤崇安縣九百四十一斤內探春三十三斤先春二百八十斤次春一百五十斤薦新四百二十八斤。南宋時蘇州茶額六千五百斤元無額明納錢三百十九萬三千有奇。成化三年南戶部奏准供用庫歲用芽茶坐派池州府二千斤徽州

府三千斤茶葉徽州府二千斤蘇州府二千斤滁州府二百斤徐州二百斤和州三百斤廣德州三百斤。四川茶園十株取一徵茶二兩茶四十斤易番馬一疋李文忠以茶五十餘萬斤易馬一萬三千五十八疋今茶課本色十五萬八千八百五十九斤係石泉建始長寧等縣并建昌天全烏蒙鎮雄永寧九姓土司辦納。陝西茶課今五萬一千三百八十四斤係興安紫陽石泉漢陰西鄉歲辦。宋元時貢芽茶以建安為上明朝不貢閩茶即貢亦備宮中浣濯甌盞之用貢使率賫銀抵京買納間有採辦亦取諸延平非武夷也延平人呼製茶者曰碧豎

龍生九子蒲牢好鳴囚牛好音螭吻好吞嘲風好儉睚眦
好殺負^負巒好文狴犴好訟狔狔好坐霸下好負。又博物
志憲章好囚饕餮好水蜥蜴好腥蠃蚶好風雨螭虎好文
采金猊好烟椒圖好閉口蚘蚘好立陰鰲魚好火金吾不
睡皆龍種也

平湖徐在中以工部郎分司張秋張真人舟過其侍兒膚
貌清麗徐見而謔之真人曰先生宜自重此某地龍也徐
不信命進盤水侍兒躍入雷雨應時而作

萬曆己卯行人謝杰使琉球航海颶風作大雷雨有龍二
掛于檣上一長年曰此來朝壘書耳急扶杰起書免朝二

字示之即退

龍涎香出蘇門答刺國其國西有龍涎嶼峙南巫里浮洋
中群龍交戲其上遺涎烏國人駕獨木舟伺採之每一斤
其國值金錢一百九十二枚准中國銅錢九千文嘉靖三
十四年下戶部取龍涎香百斤徧市不得廣東藩司購每
斤懸價千二百金僅得十一兩進內驗不同仍亟取真者
廣州獄囚馬那別的貯有一兩三錢上之黑褐色密地都
密地山夷人繼上六兩白褐色細問狀云黑者採在水白
者採在山皆真不贗尋有密地山商再上通前共十七兩
二錢五分次年進內辨驗是真自後夷舶稍二扶來定價

每兩售百金其為用入香合和能斂腦麝清氣數十年香味仍在焚之翠烟^裊空不散涎味有三品一曰泛水一曰滲沙一曰魚食泛水者輕泛水面洄人伺龍出隨取之可入香用滲沙則凝積多年氣滲沙中魚食則化糞散于沙上皆不中用而魚食又有二種海旁有花若木芙蓉者春夏間盛開花墮海中大魚食之或先食龍涎則腹中脹滿昂頭向石上吐沫乾收可用惟糞者不佳

弘治元年左副都御史邊鏞奏禁織蟒云爾雅蟒者大蛇也蟒無角無足龍則具角足今織蟒俱龍非禮諸禁之脆蛇出崑崙山聞人聲即出^寸斷人伺其斷鉗取之須寸各

異處待風乾入藥若少頃無人聲寸寸仍續成蛇主治色癆及驚疑喪膽諸症本草方書不載見玉鏡新談

八梢魚灰褐色無鱗腹圓口生腹下後拖八尾產遼東海中永平盧太守騰龍以餽明相國庖人來詢魚治之法余亦不知也以意答之用滾水燻去皮其尾如猪小腸而色較白寸斷之用葱韭雜炒及登盤鯉氣觸人不堪下箸而一統志載入遼東物產太守以充土貢何所取也

通州人葛原六以布衣獻鱮魚百尾時用法嚴或阻之原六咲曰爾不上食父母耶君猶親也庸何傷及至上召問曰魚羹何如對曰臣未進不敢嘗也上大悅命賜酒食仍

還其一曰勞汝其後歲進至九十九尾著為令
永樂時山東進野蚕絲製衾薦太廟群臣稱賀今齊東山
谷處有之與家蚕等蚕月蚊種出蛾散置樹上聽其眠
食柎葉者名柎紬食椿葉者名椿紬食椒葉者名椒紬
野人飼蚕架廬林下手長竿逐樹按行為禦鳥鼠其穰者
春夏秋歲三收烏有一種蚕之小者作蠶堅如石大才如
指頭在深谷叢林間不關人力樵收過之收曰山蠶
弋陽汪少宰偉嘗赴中官席飯僅半甌香滑而膏異於常
產問所出則蜀中歲進其米生于鷓鴣每尾止取二粒放
去明年仍可取也

西苑獅日食一羊西域胡人主之白布纏首金帶衣綠支
正三品料

明孝陵享殿大祖高皇后南向左淑妃李氏生懿文太子
秦愍王晉恭王次皇妃某氏生楚王魯王代王郢王齊王
谷王唐王伊王潭王又次貴妃某氏生湘王肅王韓王瀋
王又次貴人某氏生遼王又次美人某氏生寧王安王俱
東列碩妃生成祖獨西列見南京太常志孝慈皇后顯然
無子而弇州別集同姓諸王表自懿文成祖外秦愍王棟
晉恭王桐周定王楠俱母高皇后吾學編亦然與志不合
不可解也

鄭貴妃父承憲貧甚以女許孝廉某為妾臨別悲慟孝廉
閱之遣還不責聘鄭感其意脫隻履于孝廉矢報已而入
宮大得幸念前事而忘孝廉名命小璫售隻履于市索
直若干無應者時孝廉計偕聞而往合其履妃泣告于上
曰非若人妾不及執中槌矣何孝廉謁選得善地歷官
監運使貴妃後生福王常洵有如意之愛上書其名于金
盒屬妃藏之約他日以為東宮辛丑十月皇長子受冊貴
妃持盒泣訴之上啟書字俱蝕嘆曰此天也妃卒後謚恭
恪惠榮和靖皇貴妃

孝節貞肅淵恭莊毅烈皇后周氏父奎蘇州人徵時寓京

師寄食為人篋庫元配生子鑑繼丁氏生子 及后信

王選妃后與烏信邸入正大位后生東宮及定王貴妃田

氏生永王悼靈王貴妃寵日盛意圖奪嫡一日永和宮婢

貴妃居永和宮於金後貌下誤觸定王中宮銜之上每召貴妃

例御鳳輿小璫舁之是日舁以宮婢上問故曰小璫多姿

肆無狀扣其實曰聞坤寧宮小璫狎宮故遠之耳上色動

即搜其處大得狎具蓋宮人各侶其璫所謂對兒也一名

對食上驟怒立遣諸小璫中宮因懟恨成疾嘔血有老宮

人曰田氏宮中獨無對兒乎亦可搜也已而果然上疑始

釋都督田弘遇聞之大怒嗾貴妃上章引咎上意解令省

愆例開中門從旁門出且以章示中宮明無嫌也其章出御史湖南劉興祥手蓋知遇所囑云貴妃薨明年春知遇復進少女年十三見寵欲即進封司禮太監某言貴妃以選入非外進也乃止賜珠簾等物嗣後貴妃妹走天津珠簾猶存後為朝士某妾。按田貴妃名秀英其妹名淑英徐中山第三女名妙錦文皇欲取為繼后女不可因不嫁而為尼嘗論革除事建文君當坐殿上燕王至苟不讓則死之何必自焚竄每語遜國事未嘗不痛哭也

崇禎十六年五月大學士周延儒放歸復見徵知不利求解於中宮賂嘉定伯周奎十萬金達之中宮請授指東宮

東宮每晨謁及是啟曰近來久不見周先生何也上曰爾何自知周先生答曰父皇嘗稱周先生故知之上曰此非好人今不得稱先生上心知其奸尋賜死其日黎明錦衣弁同法曹至私邸排闥而入家童各驚匿周求青衣未得緹校脫而衣之拜命飲泣求筆墨占句倉皇不屬使者促之投筆就縊

萬歷十二年故太師張居正子禮部主事敬修自縊遺辭其略云五月初三日邱侍郎至府初四日即差官提敬修面審大意坐先公以二百萬家貲又要扳承天夷陵本縣三家坐曾確菴家寄銀十五萬坐王少方家寄銀十萬兩

坐傳大川家寄銀五萬兩只得從當事之意料三家斷不能完結此事吾日後何面目見之又以母子叔姪恐團聚一處有串通之弊於五月一日出牌追令隔別不得接語幽囚倉屋風雨蕭蕭、青草鳴蛙無不助予之悲悼遭時如此已無生路不得已託言片楮以代剖心此書送各司道一日五月十日寫完以期必遂而夢兆稍吉不果至十三日各欽差上司會審叔姪俱嚴刑拷訊父母遺體平生眼不見刑具脆薄之軀豈能勝之此數之莫可逃也任巡按活閻羅你也有父母妻子之念何忍殺人媚人如此之酷烈也有便乞傳山西蒲州張相公說張門事已完結矣無

煩掛念願你輔佐聖明天子於億萬年也云云按邱侍郎名樞齊人懸贓酷拷貽楚患數年卒無子任巡按名須更考

康熙乙丑年元旦立春有大老署門云歲朝春百年難遇聖天子萬壽無疆按崇禎元年元旦立春陳眉公用此聯作楹帖

郊上辛社稷上戊文廟上丁戊在丁後故先丁如十日丁則一日戊當先戊而後丁如治間吏部主事楊子器上言戊從初十之丁則次戊非上戊也時無諳禮者竟寢不行

坐傳大川家寄銀五萬兩只得從當事之意料三家斷不能完結此事吾日後何面目見之又以母子叔姪恐團聚一處有串通之弊於五月一日出牌追令隔別不得接語幽囚倉屋風雨蕭々青草鳴蛙無不助予之悲悼遭時如此已無生路不得已託言片楮以代剖心此書送各司道一目五月十日寫完以期必遂而夢非稍吉不果至十三日各欽差上司會審叔姪俱嚴刑拷訊父母遺體平生眼不見刑具脆薄之軀豈能勝之此數之莫可逃也任巡按活閻羅你也有父母妻子之念何忍殺人媚人如此之酷烈也有便乞傳山西蒲州張相公說張門事已完結矣無

印簡肅公李侍借中官張誠往籍法居山家初梅為居山所推人謂持之必急以扶荆丹法
氏直道所當修坐三家萬者有教字終其法世受其子守字伯卿以進士授海州知州日治
年二十五年臨中守警字似林以進士授處州知府此其子守字伯卿以進士授海州知州日治
上子子恐未為定法也簡肅公名色御前外子初相稱于此

康熙乙丑年元旦立春有大老署門云歲朝春百年難遇
聖天子萬壽無疆按崇禎元年元旦立春陳眉公用此聯
作楹帖

郊上辛社稷上戊文廟上丁戊在丁後故先丁如十日丁
則一日戊當先戊而後丁知治間吏部主事楊子器上言
戊從初十之丁則次戊非上戊也時無諳禮者竟寢不行

李崆峒集

四明中秋宴飲以八月十六日相傳史彌遠官臨安還家
度節沮風是夕始到遂沿為俗業業師云

洪武十七年勅每月朔望祭酒以下行釋菜禮郡邑長以
下詣學行香。按北齊每月朔祭酒博士諸生展拜階下
郡縣朔朝朔日行禮始此其後遂以朔望行香朱子曰謁
宣聖焚香不是古禮捨香不當叩頭只直上捨香即出笏
叩頭而拜由是觀之則宋亦然矣

康熙甲子秋九月海岱門內地中忽作聲有光如電初以
為地震也已知其地舊埋火藥覆以大石板上土厚尺餘
不知何故忽發飛石所中凡傷二百餘人

無錫邵文莊寶雨辯云雲興于山勃然滿盈既蘊而降以
雨者山雲也謂之山雨雲興于海倏然瀰漫既翕而盛以
雨者海雲也謂之潮雨海雲之雨乘風以行雷鳴則止山
雲之雨挾雷以動風吹則散海雨夏少而秋多山雨夏多
而秋少

弘光初有携日本小曆一紙來者字體並從本國書首題
寬永二十一年及大將軍寺字

房山縣石經山峯巒秀拔名小西天隋大業間僧靜琬懼
本教有難不能流通發願募工鑿石刊造一大藏經積于
此山至唐貞觀初僅成大涅槃一部靜琬沒後其弟子遜

刊造餘部歷遼金始完一大藏貯于岩洞者七地穴者三
洞鑿以石門穴鎮以浮屠自來兵燹不之及二郎神即嘉
州守趙煜斬蛟者也不知何代封為清源妙道真君

泰山自下至顛五千三百八十四步五尺紆折皆在其中

高三百八十六丈九尺一寸寔十四里零八十餘步應幼

漢官儀云自下至古封禪處凡四十里者妄也有泰山道

里記沁水張大理五典云

靈隱飛來峯元僧楊璉真伽徧鑿佛像明嘉靖朝太守福

清陳仕賢進士辰以楊及郊僧聞僧三石像斲其手瘞獄中

獄中大疫或云悞毀佛像也

入蜀有三谷四道西南曰褒谷從褒入南曰駱谷從洋入

東南曰斜谷從郿入其所從皆殊舊志謂首尾一谷者非

也其棧道有四從成和階文出者為沓中陰平道鄧艾伐

蜀由之從兩當出者為故道漢高帝攻陳倉由之從褒鳳

出者為今連雲棧漢王之南鄭由之從城固洋縣出者為

斜駱道武侯屯田渭上由之丁卯五月吾鄉許時菴編修

典四川鄉試欲強余同往余不果行為詳考道里以當贈

行之篇

甲申京師被陷始末詳談孺木金陵對泣錄中今全錄於

後云光祿寺署丞膠州高弘高自賊中脫歸秋末省其兄

相國構述前厄云三月己丑朔甲辰上召考選中外官三十人於中左門諭曰國家多事南寇北。聞寇已薄固關雖無確報可謂迫於門庭朕已修省待咎此時何以撲勦何以安人心何以生財何以足用爾等其熟計之崑陽知縣黃國琦首對曰賊之驕由于召撫從來召撫無裨于事上問安人心對曰安人心不難在于聖心聖心安則人心自安上首肯筆記其名又問生財對曰今生財云加派云捐助俱非也豈非一而再再而三乎皇上宜搜內藏盡所有以為用上又首肯因問用人對曰天下未嘗無人但人未必為用上大是之立除兵科給事中餘以次對未畢

俄傳外札上手拆視訖倉皇遽退各官不敢散已傳駕回宮各官乃散知賊已至昌平也各官環閣臣于御河橋楊觀光等責以城守事魏恭德曰大家做靠不得一人是日內閣課廢吉士東宮日講官劉理順何瑞徵誦論語首章未竟賜茶退夜二十刻部推左懋泰戎政兵部右侍郎總督城守未報乙巳閉都門時傳吳三桂兵至不知即賊也夜攻阜城門即平并廣寧門即彰義門西便門漏下二十刻砲聲漸急丁夜後砲愈亟賊環攻有旨城堵尚虛一千八百守卒俱稱無餉襄城伯李國禎不登陴丙午巳刻賊入阜成西便二門人不知也丁未昧爽市人云官女出西華門

或傳聖駕昨出城辰刻宣武門北有內臣戎服可予騎云
王太監救火呼開門卷以鑰在中府擊之鎖未碎或云前
門開遂沿正陽門至則被矢砲不可近自長安右門還宮
已刻賊入宣武門肆掠內臣被禍尤慘李自成射承天門
題榜矢中天字上馳入宮午刻偽示五城購車駕所在戊
申午前內傳先帝自盡于煤山偽諭明朝文武大小官員
俱限次日赴各將軍帳下具職名彙冊送覽願復官者量
才擢用不願復官者革職為民准給路引即放回籍敢有
匿而不報兩隣長班房主一併誅戮自是各官俱分投職
名權將軍李友家自己至酉恭報七十三人劉斯球等其

其去者以革職回籍也主賊錄職名籍貫履歷寓舍僮婢
長班錄訖皆駢對廳錮之工部侍郎陳必謙不即入擊以
輿杠已酉先帝后移東華門蓆舍武選主事大足劉養貞
出私錢八十得柳棺殯之先帝不幸時首露網右足靴身
衣短後布衣曾題朕既喪國無顏冠冕見人是日同先后
長椅昇出先后衣笄甚肅鼻微傷其裳紐結越三日賊出
梓宮二一丹漆一點漆改殯為先帝翼善冠龍袍玉帶滲
金靴先后袍帶亦如之定王騎騾來臨不敢哭而去次東
宮亦騎騾至青衣裹帽頭觸地良久雖不哭隱痛不能起
賊擁之去諸臣臨哭可四十餘人臨而不哭者三十餘人

養貞日侍側哀毀被執至李友處友據邱字衎衎許錦衣
宅年五十餘性兇悍所錮各官許家人傳餐印其面而入
出即去之癸丑薄暮李友傳各官各據朝本朝見光祿寺
監事林蘭友問朝本何若有佐使吳某云紅摺黃面開職
名朝見蘭友如其言餘倣之刑部尚書張忻言黃摺非所
用付紅單職名酉刻李友列騎七十三隊、騎各五露刃
押各臣赴寓舖偽將劉宗敏拘千六百餘人夜半叱起俱
蓬垢人予匹馬飛駟入西長安門出東長安門過御河橋
皇王夾道進東華門始知非朝也至會極門偽相牛金星
深衣盤坐棕毯上面東向右侍郎宋企郊盤坐金星側北

向金星據縉紳錄一部硃筆點唱先令甲科打恭餘誦鄉
貫諭高聲以應或托疾則令扶候合選即圈于錄上赴部
聽銓注畢且回各營奔什數人乙卯又選各官昧爽由午
門入會極門牛金星宋企郊如前唱選預名者令候會極
門否則出東華門或令出西華門不解其故蓋東皆回營
西皆斬于門外凡七十六人多勳戚丙辰各營拷職官追
贓內臣加炮烙尤慘劉宗敏家論官大小勒限贓完日釋
之李友等各混拷不勒限李友家七十三員選用二十九
人聽其自捐夾傷十之四劉養貞再夾惟呼太祖高皇帝
追四十三兩又銀杯二又徵之不應曰我寧死也王都等

杖斃党崇雅除通州倉場侍郎來謁李友角巾綠衣諸人就問竟蹙額不荅中書科舍人吳橋沈集始被拘伴風疾時呼流賊來殺流賊屢受鞭不之撓至四月二十二日同釋四月戊午朔乙丑黃紙傳二十七日即位塘報吳三桂舉兵徧京師戊辰李自成馳偽勅及吳襄手書招之三桂碎其勅擲文書不啟斬從使四人釋回一人自成聞斬使大怒召李友等點兵站隊庚午自成脅東宮二王及吳襄東行步騎三十七萬戊寅吳三桂擊自成大敗之僅四萬騎回京步卒盡沒賊將李肖字所部萬三千人才還騎十七庖人一家丁二云經戰十三年未有如此之敗者癸未

午刻李自成回京入德勝門從馬約七千匹列東華門二十騎自御道入前一賊抱嬰兒不知何人也是日故學士楊觀光何瑞徵光祿少卿李天經李延昂同鴻臚寺官八人勸進自成曰事且亟何登極之有劉宗敏厲聲曰已有旨明日登極各官可出料理各官退宗敏與自成爭曰爾十幾年辛苦一旦敗壞若不登極何以回關中自成默然甲申果僭號先燬太廟主從此壞民居運入大內為爨具丁亥卯刻賊出阜城門留卒七百餘人入大內及各巷縱火高弼商拘李友家被夾勒四百金詹事張維機主事蕭鴻基至夾其骨張尚書鳳翔前出獄被拘勒四百金不夾

李自成入燕後拘明朝大小各官分營追賍有中書十數人同拘繫一室忽傳偽旨是夜俱令自經鑄鎖甚密外嚴共收之各員以次雉經氣絕縋斷大半墮地伏尸相枕籍蘇州申濟芳獨逡巡不就縊天黎明閱守者啟鑰入申急迫伏積屍中詐為死狀一守卒云生死未可知當頭人與一棍連梃數人忽一卒云料此輩已無生理鞭死何為處舍之出午後命各家僮識認尸首負歸殯殮申竟得脫後年八十餘卒于家太倉唐寔君為余說

甲申四月京報絕月餘留都疑阻十三日有中人夜至內府云京師三月十九日已失守明晨張總憲藐山謨偕御

史周元泰朱國昌郭維經米壽圖至高司農弘圖確齋所少頃確齋及史尚書可法呂侍郎大器姜詹事曰廣集議國首福王或云潞王時並僑淮安高張之意屬于洛陽史頗不然之意在衛輝恐北耗未確尚爾逡巡俄奏差回自都下云三月十六日馬服手菜筐逃出京其夕炮聲遠震迨旦寂然餘不知也諸人唯々各散二十二日史尚書以三千騎勒王渡江俾呂侍郎攝禮部印越三日史尚書速諸臣往江浦議事侍郎得史手札即傳示諸公素服會清議堂謀葺武英殿二十七日有中人奔南俗悉凶問是日告奉先殿姜詹事撰文高尚書舉筆云神宗皇帝之第二

子弟一藩云云而史尚書札至意專衛輝尋又札云洛陽
衛輝並南下當括闔孝陵之前云々此何總督鳳陽馬士
英書來奉福王發淮安將及矣即日守備南京太監韓贊
周出迎二十九日王舟泊燕子磯明日抵龍江關先召見
列侯次尚書史可法高弘圖程註都御史張慎言同謁舟
中王左手挈史右手挈高跪泣答之角巾衣葛坐榻上衾
枕俱敝蚊帳不具五月朔登三山門環城而東謁孝陵自
朝門入經東西華門宿外守備廳四日監國傳諭天下是
役也南都始議未定馬士英成之史尚書前督鳳陽稔知
福世子湛于酒色徐魏公弼基值高尚書于皇城下曰事

亟矣惟賢是立何論序乎史在高郵聞福王舟近即列諸
臣名啟迎或云士英初意亦不專洛陽與史尚書同偶值
福王舟擁而南背其始議後謂臣以兵十萬護蹕臨江欲
駕南都諸公之罪給事中李沾謂告廟文出臣筆皆非其
寔也

南渡年號閣擬定武弘光拜天探籌得弘光冢宰張藐山
曰光字一於文為火 清朝年號曰治從水々能尅火奈
何果如其言

馬士英挾迎駕之功自江北來朝不欲出鎮故事輔臣必
有入閣辦事之旨士英特繫銜大學士非內任也竟據政

府史相國因自請出鎮鑄督師輔臣之印士英忌史聲望
遠出已上又史先東士英有福藩不忠不孝等語士英意
脅之史求還故牘終不相忘掣肘陰螫以勞勩難泯遂移
構新建姜相國謂觀望異議真并陷史也

燕京從逆諸臣留都傳報不一其最著者鄉人乘怨輒馳
檄聲討姑蘇則首項煜錢位坤宋學顯湯有慶常熟則首
時敏皆焚毀屋廬尋臺臣嚴禁御史祁彪佳撫安蘇松常
鎮誅首亂六人乃止

桐城阮大鍼初附東林與嘉善魏忠節爭吏掌科因投逆
璫歷大常少卿坐黨廢避禍金陵稱詩好客素善內臣馬

應芳馬士英倚南都時數、過從南渡初總憲張藐山改
冢宰奉詔言逆案置勿用大鍼計沮喉誠意伯劉空昭拉
勲臣廷攻冢宰專右文臣自是冢宰四疏乞休士英密荐
大鍼言其知兵立除兵部右侍郎召對以高相國廷爭臺
省交論未拜命而心益急士英令徐俟之及涖官每朝罷
輒手招士英就語自示於諸紳中日同士英輩狎飲後常
熟錢侍郎附焉錢寵姬柳如是大鍼請見遺以玉帶曰為
若覓恩封談孺木云

張冢宰藐山去後誠意伯劉孔昭之權日甚自謀入相不
得乃荐兵部侍郎德清蔡奕琛南都之禍始于誠意潰于

士英大鍼

司禮韓贊周字象雲賢內侍也福王始而憚中而疎末且厭之嘗盛暑擊球三人交策不休贊周凝立不動十二月西宮成臨御上色不怡贊周請其故上曰無佳優人奈何贊周泣曰臣意官家思先帝乃如此抱恨乎上長責太監馬承芳爾但知印堂安知我印堂指贊周也

黃澍本歙人年少輕侮作葉子格品第宗婦之貌見擯于族走杭州冒籍郡庠丙子舉于鄉明年成進士授開封推官壬午禦流賊開渠轉粟河水秋溢遂灌汴城禍自開渠始又搜民間藏粟併金錢奪之汴人切齒及內召烈皇帝

面問開渠者誰也委之流賊利口迅舌人莫能難以御史按楚未及瓜遽入朝意覬開府廷劾馬士英責數其罪福王色動云黃澍言之有理顧高相國記之士英跪階下惶媿欲死出因行金結內臣張執中等蓋平賊將軍左良玉嘆馬氏故大言清君側之惡澍出良玉手書挾重鎮以劫之及澍還按楚士英陰遣人購良玉而澍孤矣尋免其官畏禍匿良玉所女歸其子明年左氏稱兵犯闕實澍為之厲階也

乙酉五月南都敗士英出逃至孝陵詭飾其母為太后召守陵黔兵自衛所過劫掠一空從廣德州走安吉知縣黃

翼聖掃衙舍以停偽太后及士英家眷浙撫張秉貞下檄
按吉問太后真偽翼聖啟云閣部既真恐太后亦非假張
遂備法駕迎入杭州偽太后駐朝天門東李總兵宅士英
屯兵湧金門外王氏園潞王恭謁太后如常禮辭之已令
妃具宴送入妃躬詣陪侍復峻辭之日夕惟與士英後妻
及婢數人相處人始疑其偽本朝兵將至士英走台州
魯王監國訪太后不得會稽熊少卿汝霖責士英不扈皇
上乃母后之狗乎士英無以應叢山劉先生前削籍家居
南渡起左都御史入京不携冠服先馳疏自稱草莽臣歷
指時事之失內及外將封爵貴陽及劉澤清忌之蓋劉自

臨清南適謂中其隱各疏攻先生澤清疏并列左良玉黃
得功劉良左高傑名請加以重僇寔各鎮不知也先生至
南京借冠服赴任士民鼓舞稱快群璫亦曰劉先生君子
也恐不得久耳果即引去

旨稱閣臣例先王九列例稱卿徐冢宰石麟忤貴陽有旨
叱其名徐尋引去

甲申秋南教坊不足充下陳私徵之遠境阮大鍼楊文驄
馮可宗輩各購進大內嘗演麒麟傳奇劇未終妓人首戴
金鳳者三蓋宮中例承幸者戴金花以自別也

甲申九月南都有選宮之命皇太后自于外守備廳擇六

人未噉命再選初各官甚慎其後會于貢院狎笑褻視選
七十餘人寢及蘇杭太后侍女金花年十八來自中州殊
色也所選並不逮王待如妃禮明年阮大鍼入其宗女雖
姝麗究不知誰氏也又書佐周某自獻其女太監田成來
駐杭州貢院樹黃旗二選五人止王氏留京上之出奔也
阮氏周氏王氏命還家

福王時雜謠。弘光年要做官非騎馬英士即種田太監射
人先射馬射擒賊先擒王鐸紅花開天子來不辦衣衫只
辦鞋。又聯周廷儒字玉繩先賜玉後賜繩。繫廷儒之
頸一同狐狗之頭馬士英號瑤草家藏瑤腹藏草。貫士

英之皮遂作犬羊之齠。自成不成福王無福兩下皆非
真主北人用牛驗南人用馬一般俱是畜生

倪鴻寶先生與同邑丁庶子進俱天啟壬戌進士選庶常
嘗中秋聯句丁首唱云中秋佳節好吟詩為人所哂上偶
問崩字何義丁曰君死曰崩倪曰先帝升遐曰崩進自慚
漸與倪成隙倪少娶餘姚陳氏失歡後官尚書以妾王氏
膺誥封丁遂修怨嗾誠意伯劉孔昭許其事倪奏辨陳氏
失母意遣歸外家命娶王宜封引海瑞前妻許氏潘氏弗
封。繼妻王氏為例幸上不問倪竟以此自免歸陳氏實
同母夫人居非遣歸者甲申末陳氏訴于朝時孔昭任事

奪王氏改封陳氏

史相國分立四鎮意在收江北之援卒不得其力先是四鎮兵各三萬餉六十萬高傑最強悍黃得功劉良佐次之劉澤清為極弱火于揚州大會諸將下敗拜求出師傑雖跋扈頗感動遂率衆而北傑至睢州為許定國刺死中旨切責定國定國畏罪遂導本朝兵南下

乙酉三月初九夜嘉興府城內外居民戶上各有圈或紅或白或書上或書日或斜書雙曉起驚異不知所自至閏六月羅兵燹惟白圈白書之家不火徐敬可云

楊文驄字龍友貴州解元不第宰青田後量移江寧癸未

蕪湖兵擾西征自效事平仍返縣任張藐山改都御史疏劾文驄榜其門不令視事明年夏馬士英入相文驄以甥婿起鎮江推官未行擢職方主事尋監軍鎮江明年五月拜巡撫僉都御史一日遽南遁時總兵鄭彩方陳列江上聞之兵立潰福王聞報即出奔迨曉馬士英亦逃南國亡福王稱制語輔臣以先後妻妃三時方訪母后於中州未及宮眷御史陳潛夫按河南以童氏至有司護送入京年殆三旬坐詐冒下錦衣衛獄童氏從獄中止書云某年月日娶我某年月下下陛下出亡所衣某色所飯何品所出何地又首帕妾所加也云々此書不知緹帥馮可宗作何狀

獄上後傳諭有與潛夫同卧起之語絲綸之地豈應污褻
若此耶聞劉澤清婦劉氏上馬士英夫人書救童氏

乙酉六月 本朝兵至杭州潞王常澆巡撫張秉貞以城
降兩浙風靡總兵王之仁守定海上其印都督方國安自
杭走金華與朱尚書大典合兵尚書以方兵剽詐不許遂
相持會山陰太學鄭遵謙倡義兵熊少謙汝霖孫職方嘉
績應之寧波則刑部員外郎錢肅樂浙東響集迎魯王于
台州西興築土城守江國安東下富陽分屯金村嶼朱橋
其屯朱橋則國安兄子元振也號土漢營大總兵萬餘船
五百餘沿朱橋列柵至轉塘口或說之曰山路莫要于西

溪而橫山大嶺扼其衝旁多間道叢竹可伏兵從此距營
二里為清風亭以千人據之且西接五雲天竺可俯瞰杭
城益張疑兵連合江東縱復不利豈能越險薄我營哉元
科不以為然元科亦國安兄子戍旗營三總也八月元科
以三十騎直趨六和塔明日戰于清風亭江東兵莫敢登
岍越三日 本朝大兵自六和塔來攻國安浮江身自督
戰自晨至晡國安失利 本朝大兵覘橫山清風亭俱無
伏九月幾望以八百騎自清風亭五百騎自橫山夜去營
一里乘勢奪橋、偏寨門守兵皆走元科手斬數人嬰柵
力戰 本朝大兵登廟山望柵中白牆不相屬遽發炮墻

傾大呼馳入方兵大潰僅得及舟而遁遂焚其柵自是國
安不復能渡江丙戌五月征南大將軍貝勒孛羅至西興
荆國公方國安將走台州馬士英以許封西平王勸國安
降遂解甲後與元振俱被殺

馬士英奔紹興辨臣非悞國又挾方國安為重命戴罪圖
功丙戌六月朔首逃

金正希先生倡義于休寧同縣令何通武遣諸生朱備迎
黃澍于九江寔不知澍已通款本朝也九月本朝帥
張天祿畧地且至戰失利先生與歙縣諸生江天一同被
執見洪承疇不屈遇害僧某殯之題曰赤壁金公柩扶至

蕪湖閩商某薄其棺改殯焉

徐冢宰虞求原名文治本禾郡諸生萬歷庚子斥場屋赴

南武闈舉第一被攻走江楚殆二十年青浦令其受業生

也遂補青浦諸生舉於鄉天啟壬戌成進士歷官介潔屢

起屢忤乙酉閏六月二十六日本朝兵下嘉興先一夕

公入城聞敗自經于故第精嚴寺僧真實殯以來因袖有

詩扇蒼頭祖敏殉其旁先生有別墅在賀家橋南其孫顯

武與予善時過話前事所著名可經堂集

錢唐大遮山東明寺相傳建文帝曾避跡於此本朝順

治丙戌某月某日有二十二人皆偉幹傑貌免胄而入命

守僧以米三斗作飯豆一斗作乳倉卒具食僧異之問飽未曰未也亦不敢飽飯後徧視佛像不拜見建文像則拜而下泣一人在前餘隨後不敢並已而求浴裏衣朱啟膚如刻漆人臂二弓腰二銃試鳥雀不一失鎧仗重鉄度所負荷皆百餘斤其一人泣拜者挽鞭重數十斤合二僧之力僅能舉而被運之如棕拂竹如意問邑里姓氏不答聞其聲知為北人也問今何所往則泪隱々承睫曰吾糶盡遊觀天下無可起事者吾安之乎曰三吳足賦可就也曰取三吳未能集事僧曰以諸公之敢力赴義何患無成默不應諷之若空亦不應僧曰即出值官兵奈何曰吾仗劍

行數千里先後所值何啻百十彼烏能難我僧曰自此至天目民寨殆百餘所稱義師能往觀乎曰曾按視一二所皆盜耳不足目也因問道僧述天目徑山湖州之程曰吾之湖州曰湖州多守兵曰固欲遇守兵遂胄而出每一人胄兩人力收之目欲迸火尋問其遇守兵殺五百餘人而二十二人無恙愴然嘆曰吾多殺亦何益且吾所以來豈為此輩哉皆投碧浪湖死外舅陸辛齋先生述寺僧指月之語洪武三年庚戌五月始詔行科舉直隸貢百人河南山東山西陝西北平浙江福建江西湖廣各五十人廣東廣西各二十五人時直隸就試者百三十二人拔七十二人見

考官宋濂溪鄉闈紀錄序試錄曰小錄按登科考無錫俞
憲所輯中載在京鄉試直隸府州一百名河南山東山西
陝西北平浙江福建江西湖廣東各四十名廣西二十五
名與濂溪集微有不同又按登科考洪武三年庚戌鄉試
四年辛亥會試以後至十七年甲子始復行鄉試而金華
府志有庚戌辛亥壬子癸丑連歲開科之語紹興府志云
六年金鑄榜不知其何所出
雲南開科始永樂九年辛卯時貴州尚未附宣德四年雲
南貴州始合試共取十一人後漸增至嘉靖十四年分定
雲南舉四十人貴州舉二十五人

府歲貢二人縣歲貢一人洪武二十五年定嘉靖十年令
天下歲貢五人選共一歲貢通學考選至十五年止天啟
元年鄉試乙榜廩生准貢崇禎元年戊辰以登極始有恩
貢乙亥通考各學廩生拔貢一人己卯鄉試乙榜俱充貢
不論增附

永樂二年己選庶吉士矣而戶部辦事進士當塗李衡以
年少自請命改庶吉士同江寧楊寧習書至宣德八年三
月己選庶吉士十一月又選前科進士能文者徐瑄等十
三人為庶吉士命學士王直教習此教習之始也
舊制貢士三科不第禁赴會試弘治三年始弛此禁

弘治壬戌科選庶吉士并修撰康海編修孫清李廷相俱
課書學士梁儲王草教習先是天順四年選庶吉士劉健
等十五人并修撰王一夔編修李永通鄭環命學士劉定
之侍讀錢溥教習此外昂甲率不在館課之列萬歷甲辰
後選館概課而昂甲不出序今與庶常一例論先後矣
正德甲子四川解元周洪謨丁卯福建解元陳俊第一場
俱五義

嘉靖初會場禮部條約許舉子帶洪武正韻一部表未不
用瞻天仰聖見董穀碧里雜存

科場舊規正主考閱易書二經副主考閱詩禮春秋三經

各不相涉見詞林典故

李九我舉鄉試第一申少師瑤泉即留為館賓轉館于歸
安董宗伯家癸未李得會元申正當國廷試時文定以子
用懋入試避讀卷是科秀水朱文恪公一甲第一李名在
第二賜第後九我見秀水頗快之一日秀水疾李過候坐
榻傍推窓見庭松蟠屈咲曰弟嘗夢歷此景或云功名在
是今得之矣名次兄後非豫兆耶自後歡洽無間
殿試策進呈必取書法整齊無舛譌者隆慶戊辰科閣臣
擬進上疑首卷有私於二甲卷首得羅萬化真第一其卷
字多塗抹者

各省鄉試專遣京官始于萬歷乙酉舊主副俱教職由監察御史所聘布政使提調按察使監臨彌封謄錄所卷皆有司例得閱墨卷有所識拔內簾無敢違者自專差朝臣內外簾始隔絕

典試差部主事始于萬歷甲午禮部推湖廣主試翰林院某吏科左給事葉繼美上點葉另用工部主事莊懋華韓求仲先生師事湯宣誠萬歷庚戌湯分考搜隣房拔韓卷會元時方忌湯遂并攻韓竟免官終身不達鄉榜監試例巡按御史或偶缺則代以巡鹽萬歷乙卯貴州巡撫張霍鳴代匱監試此巡撫監場之始也

萬歷丙辰會元吳江沈同和文倩第六名趙鳴陽作事發二人俱褫革京師以骰子戲謂斷絕六

天啟壬戌會試閣臣何宗彥顧秉謙主禮闈上點宗彥忽及朱養純顧疑秀水有他故頗不懌後秀水捐館顧擬謚文懿朱公子力爭得謚文恪

廷試策偶悞筆以塗注不便例多任之萬歷己未科狀元莊際昌醪悞悞崇禎辛未狀元陳于泰陽悞易榜眼吳偉業曠悞曠

殿試進呈惟會元策另封此明朝舊例也今不然明朝宗室進士天啟崇禎兩朝共十一人釋褐後例補輔

國中尉惟戊辰科新建朱統錦選庶吉士改中舍書人復入館歷國子祭酒

萬歷丙辰進士同姓名者張銓一大名人一沁水人俱乙亥正月二十六日生科第子女先同

莆田科甲最盛宋時進士九百七十餘人諸科特奏名六百四十餘人大魁五人宰輔六人明朝自洪武庚戌至嘉靖戊子凡五十二科中鄉舉一千一百一十人進士三百二十四人狀元二人探花四人會元一人解元二十五人鄉報急足始嘉靖中其時舉子尚自備青袍後官給不知所自

選歷科程墨自萬歷庚辰錢唐人錢穀字豐寰始錢貢生官終曲靖知府

會試同門房刻始萬歷壬辰

明朝故事御批一甲三人卷用玉管筆拆卷在中極殿左西京鄉試及會試試錄序皆稱臣外省則否以考官所自序也萬歷初上摘此以問閣臣欲罪之江陵具言其故乃止其後各省錄序皆稱臣

兗州滋陽縣儒學祀宗聖顏子之神與天下不同

見陋巷志

土木之難李寰敏秉從征脫歸進戶部主事夜夢作詩送楊鴻臚善迎駕其詩云天恩寵渥作藍梅迎復君王出紫

臺群鹵潛踪歸朔漢六龍回駕入蓬萊明日以語同官明年事驗

御史出巡舊騎馬後乘輿不知起于何時當是成化以後事浙江有舉子王化大帽見按臺某按呵之問所從起對曰即起于大人乘輜之年

吳縣朱良育績學不第膺歲貢子鴻漸成進士官主事封不受竟以明經沒

鄞縣余相國文敏有父永麟幼喪父育于小江里余氏後鄉舉歷蘇州通判生文敏既貴當贈三代不知所自出不得已贈永麟所後父憐及憐父鏜而命子孫家祭則自蘇

州公始。文敏少從其父宦蘇州慕崑山歸有光名將師之不果嘉靖乙丑文敏以編修分闈拔有光第二

戚少保

繼

鎮薊門駐三屯營最久經畫周詳沒後有祠總

兵尤繼先到任不拜祠除夕公庫突獨題梁及銀牌存題

梁年月少保所記繼先嘆曰戚公神人也刑牲以祭

上海唐抑所敵先生謚文恪易名之典仍犯其名何也宜

如陳莊靖文之例易之

嘉善錢龍門初入翰林崇仁吳相國文定道語之曰若初

到衙門須記三事不擬試題不受門生不出遊庶保名節

嘉善丁清惠公與烏程朱平涵國禎相國善謂其居台鼎

猶秀才氣象

明初朝鮮國王獻顏子以偽書却之按古今偽書不一而足如毛漸偽三墳張昇偽元命苞孫定偽閔尹子阮逸偽元經宋咸偽孔叢子戴師愈偽麻衣子袁康偽吳越春秋明崑山王逢年偽天祿閣外史海鹽姚士舜偽於陵子皆不滿識者一喙也

萬歷六年河南李蔭宰宛平構小齋發礎得唐李邕雲麾將軍碑云碑石蕪沒良鄉驛舍裂為柱礎蔭輦致邑署名其齋為古墨可辨者百八十九字首篆存唐故雲三字宋學士潛溪前後集元季已盛行于世入明朝劉伯溫選

定為文粹十卷門人方孝孺鄭濟等又選續文粹十卷皆孝孺與同門劉綱林靜樓璉手自繕寫刊于義門書塾常熟錢宗伯牧齋曾于內閣見之孝孺姓名皆用墨塗乙蓋遵草除舊禁也

鄭所南心史崇禎戊寅十一月八日蘇州承天寺浚督井得鉄函重積外標大宋鉄函經內書大宋孤臣鄭思省百拜封自元世祖癸未歷三百五十六年其書始見于世其精氣自不可磨沒也朱竹垞云此是偽托不知何據

李空同刻淵明集盡去評註曰青黃者木災也太羹之味豈群口所噉哉

江都葛澗子常好集書撰國朝人物編自洪武迄嘉靖數
百卷人為列傳甚悉年七十餘卒友人私謚為正學先生
今其書不可得也

王元美所著讀書後四本捐館後公子吏部士騏于貨郎
擔中重得刻以行世又有毀論十本係先生手書無副本
牧齋宗伯乞于吏部秘不示人辛卯九月燔于絳雲樓一
炬惜哉

新逮張洪陽位司業刊二十一史於北雍糜工部六萬金
有奇見李湘洲集

濮州李尚寶先芳選明朝燕趙秦晉齊魯河洛淮揚藩邸

之詩附以蜀曰明雋吳越荆楚不與焉東阿于文定序曰
自二南以下十五國風皆江以北地也降而春秋吳越之
歌吟乃出降而戰國荆楚之騷賦始傳故江以南之聲則
歌吟騷賦之流而風之餘也非始音也原音之始以北先
也。按李尚寶與王元美同時人

南元陳文憲于陞當國時修正史列聖本紀皇后本紀建
文景泰以寔錄附載而不作紀郊祀廟祀典禮樂律天文
歷法宗藩學校選舉職官經籍賦役貨幣漕運河渠鹽法
軍政兵制馬政刑法郡國九邊二十二志楊徐滁陽三五
高祖之十七藩成祖之二藩仁宗英宗各四藩憲宗之三

藩外戚洪武之功臣諸臣建文諸臣永樂之功臣諸臣洪
宣諸臣正統天順景泰諸臣成化諸臣弘治諸臣正德諸
臣嘉靖諸臣隆慶諸臣入理學文苑循吏高逸孝節亂逆
權幸方技四夷列傳二十六紀志粗畢擬草列傳丁酉六
月三殿災輟業南元卒四明沈相國殊不以為意非其始
議也書竟不成

西泠社事起萬歷丙戌八月時歛縣汪伯玉鄞縣屠長卿
輩集西湖之淨慈寺地主則仁和卓明卿餘杭徐桂

杭州布衣陳植之業醫若吟好學其五言佳句如疎鐘四
壁靜微雨一燈明移花春徑雨看竹午窓風絕似中唐風

格惜全章散佚不傳周青士所紀尚多偶錄此

洪武開國事略本湖廣行都司經歷蔡于壁之龍飛紀略
卓氏藻林本吳興王氏所輯嘉隆以來諸公掠美者頗多
藏書之厄如浦江鄭氏八萬卷燬于火義烏虞守愚侍郎
德燭叅政父子築樓藏書萬卷暑日樓不延客書不借人
後蘭溪胡孝廉應麟賤直得之隨亦散佚大倉王弁州書
最富再傳而失開封中尉睦樗之萬卷堂會稽鈕氏之萬
卷樓吾鄉祝侍郎耳劉之萬古樓武原駱侍御駸曾平湖
馮考廉茂遠常熟錢宗伯牧齋非流散則灰燼矣楊循吉
既老散書與親故云令蕩子爨婦無復着手亦一道也

錢牧齋撰明史共二百五十卷辛卯九月晦甫畢越後日
絳雲樓火作見朱衣人無數出入烟焰中隻字不存
黃石齋先生著孝經集轉又奉命纂洪範明義四卷戊寅
謫官即進呈云臣考篇中有錯簡者三訛字者三錯簡如
五紀三德敷言錯而在後威福建極敷言錯而在前訛字
如晨為農戈為武強為極之類皆伏昆之所不稽鄭孔之
所未說宋元諸儒稍發其端明興諸儒未竟厥緒云云
崇禎癸未楚撫宋一崔敗沒妾金陵陳氏色藝兩絕為門
客王屋所聘貴陽謝叅政上選先娶致訟新安程奎戲作
絕句歌舞叢中度歲華一朝忽散抱琵琶前身定是烏衣

燕不在王家即謝家

長泰盧岐嶷嘉靖甲辰進士終貴州按察使初為戶部郎
與汪道昆同舍時有餽汪脂香油皂者汪徵故寔盧曰唐
人謝賜口脂豆澡此二物也宴席有御糖汪復問于古云
何盧曰漢光武禁視糖不許高大此是已
李空同作文凡地名官銜俱因時制不用古名
江陰李戒菴湯筆載先世公閩中寫吳原年洪武原年俱
不用元字想國初惡勝國之號故民間相習如此按元字
避御諱元章戒菴悞矣

陳友諒後裔為沔陽柯氏馬氏與部曲談王吳三家逋居

興國大治瑞昌界中張士誠後裔為章邱李氏初敗時乳
母携幼子而逃冒李姓

鈇券分三等國公式二其一高一尺博尺有六寸次高九
寸五分博尺有六寸候式三其一高九寸博尺有五寸次
高八寸博同上又次高八寸博尺有四寸五分伯式二其
一高七寸五分博尺有三寸五分次高六寸五分博尺有
二寸五分

明制文臣官銜支俸勳戚官銜不支俸

外國詔勅事竣使臣上其筒禮部轉繳內府不得損壞
御史聽選聽察首浙江道內計掌察則河南道蓋明初首

下浙江先設官洪武元年詔開封為北京示重也名勝志
云北宋以河南為京畿道故寰宇記首列河南、宋以臨
安為京畿道故紀勝要覽首列浙江明朝蓋兩沿宋制此
說非也

凡占籍者自軍匠民竈商外有儒籍官籍御醫籍先賢籍
正德庚辰吾宗嘗熟派穹隆公應兆以御醫籍登第崇禎
丁丑進士四川某齒錄書儒籍以祖父三世皆教職也

洪武十四年二月建太學自孔子以下皆撤像設神位外
學仍如舊至嘉靖九年天下學宮始撤像易主

征南將軍印沐氏鎮雲南世佩之其印不全用量事大小

或用一角用半角蠻人奉如尺一

南京洪武朝陽太平三門禁出柩魏國公家葬鍾山許太平門倒出

從來棺柩止有出城者故旅襯還鄉率停于墓田康熙乙丑崇明相國宋文恪薨於京師奉旨馳騎差官送歸公子扶柩入數州府城里第治喪此變例也

宋景濂先生以洪武十四年辛酉卒于貶所葬夔州蓮花峯下越三十三年永樂癸巳十二月二十七日蜀獻王遜葬于成都之華陽安養鄉又七十二年成化乙巳十二月十三日蜀惠王改葬錦城迎暉門外

明初文臣多不得封贈父母及妻始于永樂十年然其時亦僅八人西楊勒石以垂後

京省設提學憲臣始正統元年五月命于二月八月兼督民間裁種桑棗先是守令提調諸生孟月試經義仲月論表季月策皆在學舍今之觀風季試其遺制也

明朝大宗伯不從翰林出身者凡三人錢唐楊寧正統己巳遂

寧席書嘉靖甲申嘉定徐學模萬曆庚辰雖起署曹然皆進士出身

向例禮部堂屬未有用孝廉者康熙壬辰吾邑陳寶齋說由司空調宗伯一時以為盛事陳壬子乙榜也

景皇帝園不稱陵在金山上距西山不十里陵前坎陷樹

多白楊及椿合三四人抱高可二十丈

建文帝葬處距景帝園不遠石碑題曰天下大法師之墓
按楊士聰玉堂薈記云駙馬都尉鞏永固請追謚稱皇帝
上語輔臣曰建文無墓何憑追復尊號惜當時無據此以
對者

人海記卷下

海寧查慎行悔餘纂

景泰以前漕船無定數天順後定船一萬一千七百七十
五隻官軍十二萬一千五百餘員名至崇禎中額船一萬
二千一百四十三隻米四百萬石每舟正米三百三十石
每百石加耗九石八斗又月糧四十金行糧十六金。浙
江舊額二千四十六隻糧四十萬石。江南舊額各衛共
四千四百五十九隻俱清江浦提舉司所造
南京貢船共百六十六隻龍衣舡不與焉又兵部馬快舡
六百隻俱供進貢

明朝國朝民運白糧惟蘇州松江常州嘉興湖州五府有之共船五百六十七隻

成化間松江人以布餉貴近流聞禁廷下司府織造赭黃大紅真紫等色龍鳳斗牛麒麟等紋工作胥吏因緣為奸一匹有費白金百兩者孝宗在東宮深知其弊即位首罷之嘗閱內帑見之曰此布一疋文綺十疋價也終身不一御自是遂絕

松江細布歲輸京十二萬三千八百六十匹華亭亦萬五千一百匹有奇上海四萬二千七百二十匹有奇青浦二萬三千四十匹有奇萬歷初加八千匹

弘治十一年大學士謝遷言臣祖榮任福建布政司都事例不得封乞以已得誥命移贈上並予之天啟初太子太保吏部尚書張問達言臣父某任四川眉州判官坐劾奪職臣令濰縣復冠帶不得封今乞恩命許之閣臣賜蟒服始弘治十五年十二月己巳

北京宮殿遇災凡九永樂辛丑四月庚子三殿災壬寅閏十二月戊寅乾清宮災弘治戊午十月甲戌坤寧宮災正德甲戌正月庚辰乾清宮災嘉靖辛丑四月辛酉九廟災丁巳四月丙申三殿及文武樓奉天左順右順午門災辛酉十一月辛亥萬壽宮災萬歷丙申三月乙亥乾清坤寧

宮災丁酉六月戊寅三殿災

嘉靖時祖宗御容藏永孝景神二殿

嘉靖癸丑暹羅國貢白象道斃使者以珠寶飾牙置金盤中并獻象尾

秀水朱文恪公萬歷癸未進士第一臚傳日文恪父太醫院使東山公緋服侍班。乙未以修撰朱國祚為司經局洗馬故事昴元無任洗馬者八月克皇太子侍班尋清理貼黃靖難功臣舊署奉天征討文恪曰文皇不得已值此奈何以同姓加征討名悉改靖難

每年十一月朔傳戴煖耳百官傳衣不謝傳煖耳獨謝

韓城薛相國國觀不良死坐贖五萬籍其家財六白金所居廳事三開共室四進並世產也惟好使氣故鄉人不附
朱右君述霍魯齊語

燈市舊在內城東華門外今移正陽門外靈祐宮傍至期結蓆舍懸燈高下聽遊人晝觀蓋京師坊巷元夕不放燈也

大內牡丹盛開神廟思以磁瓶貯之偶江陰民有一均州瓶高數尺許欲得十金或咲之忽內官覓進上喜問價幾何奏曰二百金上諭先給百金如未肯再給五十金
神宗侍皇太后最恭篤萬歷丙戌梓宮殯殿產蓮花九枝

故後稱九蓮菩薩閣臣申時行許國王錫爵皆有瑞蓮府
明初武職多拔于勲胄後乃開保舉將材之例徃徠狗名
而不責實華容劉忠宣為大司空始議行武舉疏請倣唐
宋故事每遇文舉鄉試之年亦將武舉預期行移各省試
可取者送兵部會萃數目請于次年四月開科初較騎射
以發十矢中三矢以上者為合式次較步射發九矢中三
矢以上者為合式三試策二道論一篇優者列職推授若
非全材則斥而不用

元張中丞養浩歸田類藁有登憫忠格詩自注云北三十
里為大內虞文靖集作楊襄敏碑云至元某年始大城京

師于大興故城之北中為天子之宮廟社朝市各以其位
而貴戚功臣悉受分地以為第宅然則元之大內在今地
壇之右矣當時櫛李願淵白猷燕都賦寧海李洧孫有大
都賦惜皆佚不傳也

興隆寺有八景如正間都下諸公賦詩成卷馬東田和之
復為跋尾今詢之寺僧罕有知者
北方山藥產于采育者為天下最嘗于朱竹垞檢討席間
食之真瓊糜也

大房山僧多值牡丹其色有天紅淺綠二種絕奇

宣德紙有貢箋有綿料邊有宣德五年造素馨紙印又有

白箋洒金箋五色粉箋金花五色箋五色大簾紙磁青紙
以陳清款為第一
元方輿勝覽大興府載佛寺三十八區中有海雲寺元時
有千葉杏二株名芙蓉杏傅巖起在京師築清晏堂以此
花置瓶中錢唐張叔夏見之稱其奇麗可觀江南所無巖
起索叔夏賦之為填三姝媚詞海雲寺今失其處故老蔑
有知之者

出阜城門西行三里許有報恩寺又西三里靈佑觀又西
為廣福寺又西為嘉祥觀又西為元應觀八八里莊堡為
摩訶菴又西為永慶寺又西為慈壽寺又西為元福宮嘉祥

觀多松入門二株尤秀潤摩訶前殿有碑二碑文左為鉛
山費尚書竄撰右為華亭孫尚書承恩撰俱嘉靖二十七
年立殿後右廂有竹一叢院中雜蒔草花堂懸萬物育三
字墨跡上用恭穆獻皇帝睿筆墮下有嘉靖年製小印堂
後松二株高出殿脊其後則中官趙政墓也元福宮建于
正德五年至天啟五年重修中有蒼松四最奇古後殿三
清六真像皆范銅為之配殿文昌與夾侍童子亦銅僮旁
鑄一騾銅質光潤絕似宣德鎏金燠爐色殿前後凡四碑
一什二為人磨去止存中書舍人袁志學一碑崇禎元年
所立也

興勝寺去摩訶菴二里許土人目為松林今松無復存者
萬歷中所建後有藏金閣經可眺西山東北有果園中有
亭曰象芳亭北砌石為流觴曲水其東有閣曰明遠春月
桃李雜發登閣望之不異錦城花海也

阮大鍼降時本朝兵方下浙東儼然以福建巡撫為掌
握中物隨征南行至仙霞關暴死其僕下嶺求棺不得時
天氣炎熱三日後乃得開扉一扇募土人昇下山則尸骸
悉潰爛虫出矣草之薄殮不知埋骨何地無子絕祀
馬士英自南都逃至紹興入方國安營既而阮大鍼亦至
本朝兵渡江士英國安走台州大鍼迎降錄用降官奉有

阮大鍼投誠獨早之旨以軍前內院隨征急招士英及方
逢年方國安等出降時唐王改元于延平士英心懷首鼠
密表通軍中消息及本朝兵下仙霞關唐王倉皇出奔
書損委棄道路貝勒于亂籍中得士英表大怒以洩漏軍
機與二方同日處斬懸其頭于黯淡灘而去時錢西頑先
生在福建親見之

南渡立國有三疑案甲申十二月有僧大悲蹤跡頗異至
石城門為邏者所執詔府部科道法司會審據供稱先帝
時封齊王以崇禎十五年渡江其語似顛似狂詞連申紹
芳錢謙益等于是阮大鍼楊維垣等令張孫振窮治之欲

借此以羅織清流遂造為十八羅漢五十三叅之名如徐石麟徐汧陳子龍祁彪佳等東林復社計一網盡之孫振審詞云大悲本是神棍故作瘋顛主使寔繁有徒陰提線索語多挑激王怒而王意不欲深究御史高允茲上疏解之申錢各具疏辨馬士英遂不窮其事以弘光元年三月棄大悲于市時又有童妃及北來太子二案真偽莫辨上初封德昌郡王娶黃氏早薨繼李氏再繼童氏封王妃生子不育洛陽陷逃民間與王相失太妃及童氏各依人自活太妃之南也巡按御史陳潛夫奏妃故在上不問至是自詣巡撫越其杰所具陳本末廣昌伯劉良佐以儀衛送

至都王大愠下鎮撫拷問妃在獄細書入宮月日及相離情事云以某月日城陷爭出宮妾具饌奉帕裹王頭踰墻而逃求馮可宗為之轉達王棄去勿視命屈尚忠加酷刑妃號呼詛罵尋瘦死獄中或云在獄未死南京陷不知所之有言童氏周府宮人逃亂至尉氏遇王旅邸相依生子已六歲王南奔各不相顧氏遂委身民間馬士英勸王迎入宮不聽劉良佐奏童氏寔非假冒懇賜曲全王諭童氏妖婦冒朕結髮宮闈風化所關豈容闖入法司即示情節以息群疑覽王諭但斥其冒結髮則為繼妃無疑士英據外訛傳謂逆旅生子業已六歲勸王迎致此語大妄不

思洛陽之陷在崇禎十四年辛巳正月距甲申纔四年耳
安得有六歲子哉宜王之不聽也至于大悲事跡始終不
明既入獄受當事意旨不得不托瘋顛意其招辭必有駭
聽之語故急誅之以安反側耳不然阮大鍼方欲快心于
東林豈紹芳謙益一辨疏可免士英何所畏忌勸令中止
王意復何所傾惜不欲深究其中顛末朝臣固不能知也
初福世子歿德昌郡王以序當立士英撫鳳陽時有以居
民藏王印首者取視則福王印也詢其人云有負博進者
持以質錢士英因物色之王與士英初不相識但據王印
所在則以為真世子甲申國變後南都方議所立士英處

從外擁戴福王以為己功大悲者或云齊庶宗士英之不
肯窮治或止知德昌之當為福世子猶未能寔信王之果
為德昌也王之不欲深究亦有自知之明耶童妃但知德
昌即位故詣闕求見而不知今日之德昌非昔日之德昌
也大悲但知福王世子應屬德昌而不知王之業已為德
昌也童氏既下獄自言失身之婦無敢復生非望但求一
覩天顏歸死掖廷夫童氏陳情愈切則天顏愈遠何不求
見太妃名入永巷面訊之也童氏既不容見則大悲之死
固其所矣。烈皇帝殉國後或傳太子匿太監曹化淳家
為嘉定侯周某出首或云被脅東出薨于三河所傳不一

福王稱制有少年至留都自稱故太子也時馬士英未敢
決以為偽但設三疑端以迎合上意而首斥其偽者王鐸
也鐸不過欲效雋不疑以自附通經足用者耳至于方拱
乾辨誌面質其偽反滋人疑拱乾是時方從北來掛名從
賊之案待命吳門一旦召之入都還其原官許其湔雪有
不奉馬阮之意旨者乎拱乾舊為太子講官考東宮出閣
去乙酉無幾時豈有少年于衆中望見拱乾即指彼髯者
呼為方先生而東宮面貌拱乾反不識耶果其偽也一見
立辨即宜叱下如雋不疑叱收偽衛太子事豈不直捷乃
漫不置一語頌以講讀時瑣事為問蓋當時講官止拱乾

一人在列旁無一人為之証佐即少年所答盡是拱乾竟
以為非誰從質耶及再審時置禁城圖于前指宮殿名目
及帝后所御居無一差謬士英初令大璫盧九德及舊東
宮內臣于城外僻處以先帝并永定二王庚甲及宮庭制
度詰之無不熟悉于是鞠問計窮楊維垣乃颺言于朝曰
駙馬都尉王昺姪孫王之明貌類太子固悉宮中事士英
以其言入奏從此遂稱為王之明維垣以逆案廢錮十七
年宮闈親密何由知悉而此說獨出於其口聞維垣颺言
時亦祇係揣度之詞後遂據為定案時江督袁繼咸楚撫
何騰蛟皆有疏力爭王雖曉諭再三人不見信也 本朝

兵下南都豫王命少年坐聖安上携以北去不知存亡
桐城錢飲光先生熟于南渡後事余嘗詢之先生云大悲
本末不可知而決為中州之郡王也童妃出身不可考而
決為德昌之故妃也少年之為東宮不可信而信其決非
王之明也先生有傳疑詩三首載田間集中

廷杖之制最損國體然成化間言官受杖者許用綿底衣
蓋其下體故杖而不傷其膚第撻之于朝而已不欲死之
也自正德時劉瑾用事始去衣自後少杖者多不免矣弘
治以前詔獄之旨惟叛逆妖言強盜則云好生打着問喇
虎殺人則云打着問其餘常犯送鎮撫司問鎮撫奏送法

司議罪中間情罪重者始有來說之旨部寺覆奏始有降
調之旨至嘉靖中一槩打問無復低昂林貞肅公俊致仕
後曾建白此事世廟下其章所司竟不行當時首被其禍
者先京兆也

劉文靖健以程篁墩敏政短其不能詩銜之釀成廷鞫之
獄李文達賢之嘆葉文莊盛也亦以疵其詩文之故二公
賢相也其器量狹小乃爾

顧東江楹帖云才美如周公旦著不得半點驕事親若曾
子與纔成得一箇可

宋朝舊制殿試皆有點落臨時取旨或三人取一或二人

取一或三人取二故有累經省試取中屢見擯于殿試者張元遂以積忿降元昊為中國大患于是群臣建議歸罪于殿試斥落嘉祐二年三月辛巳詔進士與殿試者皆不黜落迄今永為定例

相傳明制自翰林出身始謚為文細考之亦不竟然曾榮盡衰縈馬衰敏愉俱廷試第一入內翰而不謚文魏文靖驥吳文恪訥葉文莊盛鄒文敏濟儲文懿權邵文莊寶楊文恪廉姚文敏夔王文莊鴻儒何文肅喬新非翰林而皆得謚文疑此例當定于隆萬以後

明初文臣無謚劉文成基宋文憲瀛宋文恪訥朱文恪善

咸請之康陵王忠文禱請之裕陵姚廣孝之謚恭靖胡廣之謚文穆則自永樂年始

李林甫之奸竟得善終乃于身後屢被天譴元和中惠州一娼震死朱書其脇曰李林甫宋紹興中漢陽蔡氏女被雷震死亦有文曰唐相李林甫明洪武間吳山陸允誠家烹鷄而鷄背有李林甫三字宛然蓋已墮畜生道矣續問

奇類林

粵西七星巖洞壁上舊刻元祐黨籍姓名明弘正間聞有欲琢去者時巡按某公謂不若留亦千古至今尚存
康熙二十年 御書清慎勤三字徧賜中外衙門按呂舍

人官箴當官之法有三曰清曰慎曰勤其言出王隱晉書
又李康答馬文正之問有曰為官長當慎當清當勤修此
三者何患不治云

正德間朝議欲起三原王端毅公恕汝南強景明寄詩云
八十耆年二品官歸來清節雪霜寒雖然海內歸心在可
奈君前下拜難鷗鷺恐疑威鳳起風雲長護老龍蟠三公
事業三槐傳留取完名久遠看公得詩竟不起。又李文
正東陽當國日久有士人投詩云才名直與斗山伴食中
書日已西回首湘江春草綠鷓鴣啼罷子規啼公得詩一
咲而已

弘治朝張少叅子醇繼孟嘗言作人須要有趣對俗人嗒
烏一語遇學士大人有道術者與之談說名理揚推風雅
媿不倦令人洒然不能遽別一時前輩如西涯相國蒲
汀尚書皆海內重望每聯輿過訪張或留坐所共脫粟之
飯間出蔬果杯酒三五巡即止諸老自公第出輒相謂曰
吾儕遇張子醇一飯勝倍別家盛筵矣

正德中韓尚書文欲攻劉瑾屬李夢陽具奏草謂之曰毋
文之覽勿省也毋多之覽弗竟也此言極中入告之款
建文二年廷試擢王良狀元嫌其貌寢抑置第二而以胡
廣易之及靖難師至金廣與翰林周公是脩先期約同死

周既自經胡負約與金幼孜解縉等迎降良後竟死節若
廣所謂有媿科名者也

明末華亭有嫠婦棄其孤兒再嫁富室又生一子及其死
也前夫之子爭葬之質之縣令縣令判其尾曰生前再醮
已無戀子之心死後歸墳難見先夫之面

先京兆公在諫垣以糾分宜謫官分宜敗後起官歷文選
正郎在吏部凡三掌大計嘗貽書與廬州公曰吾掌選九
年未嘗修怨報復一人為汝等也親筆書余不及見先君
子嘗為小子言之

鄭端簡公曉官文選時里中仕宦有餽金首飾者承以篚

而覆茗其上公直以為茗也受之其夫人手撥茗知之面
頸發赤亟傳柝請公入以語公公不動聲色第令覆茗如
初徐出召其人還謂曰吾初以家適乏茗故拜君惠頃入
內詢之家尚有餘茗心謝尊意不敢當也遂令持歸

董大參朴成進士後差過華容時劉忠宣公大夏宅憂在
里造謁為忠宣留之飯麥糲饌惟糟蝦一器董感省終
身持雅操

明武宗御祭元輔靳文康貴文朕在東宮先生為傅朕登
九五先生為輔朕今南巡先生已矣嗚呼哀哉語簡而意
備按裴晉公自為誌銘云裴子為子之道備存于家牒為

臣之道備存乎國史體裁畧同

洪武舊制內侍不許讀書識字至宣德朝始以翰林官教讀內侍監其後司禮遂有秉筆太監一代弊政寔宣廟啟之也

今州縣戒石銘爾俸爾祿民膏民脂下民易虐上天難欺四語乃宋太宗書以賜郡國立於廳事之南者按成都人景浹所著野人閒話其首篇載蜀主孟昶為文頒諸邑云朕念赤子肝食宵衣言之令長撫養惠綏政存三異道在七絲馭鷄為理留犢為規寬猛得所風俗可移無令侵削無使瘡痍下民易虐上天難欺賦輿是切軍國是資朕之

賞罰固不踰時爾俸爾祿民膏民脂為民父母莫不仁慈勉爾為戒深體朕思凡二十四句

明世宗初憲華亭刻石南雍曰徐階小人永不叙用後分宜得罪徐遂大用直至首揆眷注極寵渥石刻之言殆忘之矣

弘治五年吾浙鄉榜胡世寧孫燧王守仁三人同舉是年場中見三巨人後宸濠之變胡發其奸孫以巡撫死難平其亂者文成也三忠臣共成一事豈非前定因記宋寶祐年登科錄第一甲第一名文天祥字宋瑞小名雲孫小字從龍年二十第二甲一名謝枋得字君直小名鍾小字君

和年三十第二甲二十七名陸秀夫字君寔年十九是榜
三忠臣死宋事皆少年尤奇

天子為臣下作碑者唐太宗為魏徵高宗為李勣玄宗為
張說德宗為段秀寔宋太宗為趙普仁宗為李用和神宗
為韓琦明太祖為徐達太宗為姚廣孝一宗為張巒

六部司屬皆書本部而都察院各道則直書道銜而不繫
于院初謂各道得自彈事于院不相關白也按歐陽公歸
田錄云御事臺故事三院御史言事必先白中丞殆非唐
故事劉子儀為中丞始榜臺中今後御史有言不必先白
中丞考唐時李承嘉為御史大夫召諸御史責曰近日御

史言事不啓大夫禮乎蕭至忠答曰故事臺中無長官御
史人君耳目比肩事主得自彈事不相關白若先白大夫
而許彈事如彈大夫不知當白誰也李無以屈今之御史
條陳事宜無不承總憲風旨者失立官初意矣

左寧南初畏流寇張猷忠之鋒避居九江遊擊胡以寧鈞
致之遂任軍閫廂一年巡道葉士彥以大義諷之仍返武
昌乙酉南京立國監軍御史黃澍與馬士英構隙偽傳邸
報藏太子詔召良玉入清君側澍從史之遂挾楚督袁繼
咸自武昌東下三月二十七日至九江繼咸標將郝二所
統與左營相連四月初四日大肆焚掠良玉氣塞而死

常熟楊子常家富于財初無文采而好交結文士與太倉
顧麟士姜東二張友善以此有名諸生間初與同志數人
為應社其後二張名驟盛交益廣乃改名復社和獎風流
幾之奔走天下而與楊顏之交始終不渝前輩之厚道如
此

楊琳者四川人舊以小吏給事張獻忠左右本朝順治
末年隨孫可望降初授太倉州判陞吾郡臨安知縣嘗與
人言獻忠破開封獲福王醢其肉雜鹿肉煮之以分餉將
士名為福祿羹

萬歷中無錫葉工部茂才參之權閹蕪湖已事上羨金數
千奏曰久旱而得通故有羨金請不為例且進羨非臣志
也神宗賜白金松布以旌之後官至南少司空

衛與廠之設皆起永樂中其時事權盡歸閣部間有所監
督收考則付之廠衛後二百年閣與廠衛之勢漸分至天
啟而大變閣與衛皆廠之私人衛附廠以尊而閣又附衛
以重清流之禍慘烈為前古所無本朝順治初年議復
設廠衛北平張國猷時為垣中上疏極論其弊事乃寢真
定梁相國公

安慶設巡撫起于崇禎初年用歸安沈司寇演之議也天
啟三年遼東失守吳門申司馬用懋時為南太常上言請

建四輔以鞏神京東南建城于通州高米殿之間為左輔
西南建城于良鄉蘆溝之間為右輔西北建城于鞏華城
功德寺之間為右輔東北建城于密雲順義之間為左輔
敵由東北入左輔出兵以扼其衝而右輔從左、輔從右
各出兵夾擊如假道三衛右輔出兵以扼其後而左輔從
左右輔從右各分兵追襲如直薄都城下則京營堅壁合
守無輕出擊四輔各設長圍以坐困之疏上不報
王元翰滇之臨安人以萬歷辛丑舉進士時四明當國喜
王之出其門而王之心弗與也由庶吉士出為工科給事
中抗章首劾四明次及紹興晉江以湔除其衣鉢三公皆

相繼引去其黨族御史鄭繼芳發難報復糾王巡視廠庫
姦賍以鉅萬計王盡出其篋衍昇置國門縱吏士簡括罄
身辭去漂泊東南不得還滇崇禎癸酉七月死于南都客
舍貧無以為殮寃狀始白

明制翰林典試初無迴避本省之例嘉靖癸卯無錫華子
潛蔡以編修為江南主考是科瞿文懿公以易經中式後
三年丙子典江南試者即瞿也至辛酉江南鄉試無錫吳
編修情為主考同邑得雋者共十三人物議沸騰為言路
所劾于是始定例本省人不得為主考載錢吉士同文錄
批語中

葉赫國始祖係蒙古人姓土默特初滅扈倫國所居張地
地之納喇部一作納蘭遂據其地因姓納喇後遷于葉赫河崖
建國始祖名星根達爾漢生子席爾克明噶圖席爾克明
噶圖生齊爾噶尼齊爾噶尼生褚孔格褚孔格生太杵太
杵生二子一清家砮一楊家砮兄弟各居一城哈達國人
多歸之兄弟遂皆稱貝勒萬歷十二年甲申寧遠伯李成
梁以賜勅賞賚為名誘清家砮兄弟至開原繫漢壽亭侯
廟中並從兵三百皆殺之清家砮之子曰寨布為輔臣蘇
克薩哈之祖楊家砮二子長名納林布祿其弟金台石相
繼為貝勒即今相國明珠之祖也與滿洲世為婚姻後滿

州強盛始為屬國

蒙古土語呼白為察漢頭為托羅海一為干七漢木為毋
東自宣府西至喀爾喀所經之地有白頭一木兩地名
康熙癸酉五月 上遣豫京師為修齋禳禱之會初自諸
王滿洲大臣行之既而漢中堂九卿下至五城司坊大小
臣工富商大賈莫不效尤或三晝夜或七晝夜或九晝夜
各于就近寺觀設壇焚青詞以禱皇城內外緇素黃冠奔
走道路日不暇給自五月二十三日起至六月終乃止
吏部選郎例從本部歷俸而至故副郎主事率皆後輩康
熙三十四年六月德清談未菴以事去特 旨選用五部

進士出身者秀水袁靜公由戶部正郎調掌選在衙門為
後進未到任前投同司副郎主事帖俱稱晚生亦變局也
永樂初北京四門鐘鼓樓等處各蓋鋪房店房召民居住
召商居賃總謂之廊房視衝僻分三等納鈔若干貫洪武
錢若干文選廊房內住民之有力者一人僉為廊頭計應
納錢鈔歛銀收買本色鮮內府天財庫交納以備宴賞支
用今正陽門外廊房衚衕猶仍此名
明朝有宮莊屬慈慶慈寧乾清三宮取歷朝以來各府州
縣沒官田地子粒徵銀濟邊而以其餘繫之進宮項下備
給賞之用謂之三宮子粒著為令甲刊之上供正額沈榜

宛署雜記

東安門外稍北有禮儀房乃選養奶口以候內廷宣召之
所一曰奶子府隸錦衣衛其制每季精選各里良家婦年
十五以上二十以下四十名養之內曰坐季奶口別選八
十名籍于官曰點郊奶口季終則更之每遇不時宣取則
就中選一人易高髻新衣如宮粧以進產男用乳女者產
女用乳男者後來夙戒奶口內不稱旨臨時多別選城市
婦人以應有雇值之費打點之費上納之費而奶子遂為
一奇貨矣幸一見留則終其身事所乳得沾恩澤無復出
理其食報特隆云宛署雜記

明朝籍田之禮先期一月順天府行宛平大興兩縣選集
老人年高有行者數十人于本府候氣堂後隨班習儀預
備牛犁穀種及耕斂器具良民二百餘人于地壇內搭蓋
耕棚方廣五十餘步土取羅細數次覆黃土其上至期教
坊司粧扮優人為風雲雷雨地土等神小伶為村莊男婦
播鼗鼓唱太平歌兩縣民執農具各列籍田左右駕至左
手執鞭右手執金龍犁稍前導駕二員牽牛老人二扶犁
老人二執箕桶老人二夾駕左右名幫耜臣凡往迴者三
駕升望耕臺御座公卿以次親耕畢順天府治中通判
推官各携穀種箱一徧散地上老人牽牛覆土為耕種狀

小伶百餘衣田家男女服奉五穀以進駕回齋堂受賀畢
宴三品以上官賜耆老及農民各饅頭二個肉二斤隨駕
官民各執農具從至午門復賞老人各布二疋農夫各布
一疋宛署雜記

棋炒。嘉靖三十年戶部行宛大二縣領太倉銀三千散
給各燒餅舖戶每銀一兩上棋炒一石其法用白麩少和
香油芝麻為薄餅斷為棋子塊樣炒熟工部送至行軍處
所支用宛署雜記

明朝有女轎夫林鳳姜王氏等一百九十三戶查原籍福
建閩侯懷三縣人于洪武中撥送南京應當女戶永樂間

隨駕北都專供大駕婚禮選妃及親王各公主婚配應用
給與優免下帖令其男子在外供給免其雜差天順間各
戶消乏告扯五城及宛平縣會同僉補嘉靖三十一年止
存八戶又題僉楚相妻王氏一百餘名補足末年楚相等
陸續改撥錦衣校尉萬歷中復行僉補不許夤緣改撥宛
署雜記

募戶。明制宛平縣額辦酒醋局杏仁十一石五斗包麩
紙三萬張募牙二萬斤杏仁紙招商市買原有額價惟募
牙係土產之物而法又必取鮮者以是向來不議價止于
舖行銀內定腳價七兩責令近城居民數家依時采進謂

之募戶城進園丁計畦領錢彼此相幫一家出名百家共
貼其後歲令舊募戶報添二十石一經報名各不相貼小
民甚以為苦萬歷十九年內按院劉某訪知前弊行縣每
草一斤議價二厘五毫召商辦進以前募戶并雜費名色
盡行革除著為定額民困一甦

皇城內牆外曰內紅舖明朝隸五府勳臣掌管巡邏凡有
倒卧及縊溺尸骸請題隨駕錦衣衛官一員行據宛大二
縣官相驗具印結奏請定奪謂之駕相稍涉疑似必送法
司蓋以防內臣壅蔽故以耳目寄守土官也至正德末劉
瑾用事權歸內衛兩縣惟持空印結臨事填之是否虛實

法司卒不與聞非若外郡縣三覆檢平之廷尉亭讞疑法
豈外檢俱可疑而駕相可不疑耶豈在外者多斃于人而
在內者俱自斃耶于立法初意不能無悖矣宛署雜記
明朝大臣賜第京師者胡忠安在麻繩衎衎李文正在灰
廠小巷李閣老衎衎張文忠在五顯廟前張閣老衎衎李
文達在東邊王府街

景泰初開誦筵每講畢命中官布金錢于地令誦官拾之
以為恩典時高穀年六十餘俯拾不便無所得此載蔣一
葵長安客話按宣德中李時勉為侍誦學士一日上懷金
錢至史館撒之于地令諸誦官拾取時勉獨正立乃呼至

前賜以袖中金錢則其事不始于景泰朝

翰林院門左右飛沙積歲高與墻齊明世廟中掌院某嘗
令除去官僚罷謫幾空未幾沙還積如故或以為形勝宜
爾長安客話

明初六科在午門內與尚寶司相連今猶稱六科廊後因
失火遷午門外長安客話

工部有銅簞四高可過人光祿寺有鐵梨木酒榨每榨用
米二十石得汁百甕云是明初籍沒沈萬三家物
明太醫院例子端陽日差官至南海子捕蝦蟇擠酥以合
藥製紫金錠有御醫某者張大其事鼓吹旂幡喧闐以往

或嘲以詩曰抖擻威風出鳳城喧々鼓吹擁霓旌穿林披
莽如虓虎捉得蝦蟆剜眼睛

明朝祖孫父子三代為尚書者惟福州林氏一家林瀚南
京兵部尚書潮子庭機南禮部尚書庭機子孺亦南禮部
尚書

胡忠安公澂為禮部尚書自宣德丁未至景泰甲戌凡十
為會試知貢舉官

新舉人朝見着青衫不著襴衫聞始于宣宗朝謂其異于
歲貢生耳及其下第送國子監則仍着襴衫蓋國學自有
成規也

明制各邊軍士從戰身荷鎖甲戰裙遮臂等具重四十五
斤鐵盔鐵腦蓋重七斤頓頂護心鐵脇重五斤弓撒箭袋
重十斤腰刀三斤半蒺藜骨朵重三斤箭筒一斤通計共
八十四斤半

曹文忠公為初為教官不樂願為繁劇一職改泰和典史
進學不倦復修舉子業遂登進士及第八經筵尋入閣與
政士林榮之

明孝陵即梁名僧寶誌瘞所傍有八功德水誠意伯奏改
葬之乃見二大岳對合啟之誌公端坐于內髮被體指爪
繞腰矣瘞既遷水亦隨往太祖異焉勅建靈谷寺賜之莊

田甚廣仍迎其像建壇居之命太常歲祭董穀碧里雜存

成祖靖難後于都城四達之衢必建一聽經樓每夜令僧

於上諷誦經義俾臣民席地靜聽之既遷都百年後舊制

盡失尚存其一于北門橋與十廟相近嘉靖初僧復新之

人莫知為聽經樓之故趾也

明初生員惟有廩膳增廣廩膳有額增無額成化中京師

語曰和尚普度秀才拘數嚴陵姚夔時為禮部尚書奏請

故附學立為

唐時議謚之法無爵者稱子若蘊德邱園聲實明著雖無

官亦奏聞賜謚曰先生然亦有門生故舊私為立謚者如

郊稱貞曜先生之類是也後世三品以上乃得謚號而無

爵之謚遂絕

唐制公卿皆播笏于帶而後乘馬張九齡獨使人持之因

設笏囊自九齡始明朝公卿多肩輿四品以下始乘馬惟

南京與外方面官迎詔送表時皆朝服乘馬有播笏于帶

者有手自持者有人為持者以意自便無所謂故事

晉漢唐中乃儒者之冠明興科甲監儒兼而用之不在此

列者皆安分不敢潛用後來風俗僭移平人以小帽為恥

或一人僥倖科第宗族姻親盡換儒巾曰蔭襲故諺有滿

城文運轉徧地是方巾之語

永樂中禁中有剪柳之戲即射柳也元人以鵝鴿貯葫蘆
中懸之柳上彎弓射之矢中葫蘆鴿飛出以飛之高下為
勝負往會于清明端陽周賓所識小編

明制殿試在三月朔日成化八年以悼恭太子發引改于
十五日後因之本朝因今上萬壽節在十八日復改
期于後

相城劉浩性好促織嘗出婁門見水濱一大蜂以身就泥
中展轉數四起集敗荷葉上俄化為促織健而善鬪所當
無不勝者見陸燦庚已編而物類相感不載

仁和郎瑛所著名續已編內一段云福建布政朱彰景泰

初謫陝西莊浪駙丞有西蕃使臣入貢一猫道經于駙彰
館之間猫有何異使臣云向夕請試之以猫盛罩于鐵籠
納空屋中明日起視有數十鼠伏籠外盡死盖猫王也使
臣又云此猫所在雖數里外鼠皆來伏

大同初叛之歲失總兵官所佩征西前將軍印職方請給
新印鄭端簡公時為主事白郎中總兵印文柳葉篆請改
印文或稱別將軍或增減其字恐原印在叛軍處有事時
行文奏報真偽不可辨誤事非小往年胡忠安公在禮部
失行禮部之印改鑄行禮部印在內衙門尚然况邊鎮兵
權又反側不靖時乎郎中不以為然

外戚封公自嘉靖中張崔齡始耐馬無封侯者灤城富陽
永春西寧皆以軍功封惟永康公主附馬崔元以迎立世
廟封京山侯

五月五日賜文武官走驃騎于後苑其制一人執旂引于
前二人馳馬繼出呈藝于馬上或上或下或左或右騰躑
躡捷人馬相得如此者數百騎後乃為胡服臂鷹走犬圍
獵狀終場俗名曰走解音鞞去聲而不知所自始豈金元之舊
俗歟今每歲一舉蓋以訓武也觀畢賜宴而回彭時筆記
六科皆稱內府不詳所自偶閱吳人陸欽漫記謂光祿寺
及六科皆內府衙門

東直門外二十馬房收草料每一房用太監三人每草一
萬用銀二十兩其馬數不許查理亦曾有人進本乞查馬
數發問充軍。通州秋青草自正統十四年積草為敵所
焚自後令天津八衛打秋青草遂為例陸欽漫記

兵部尚書鄺野一日向恭順侯吳某取五軍之數吳以上
聞鄺走謝之以軍數非外人所預知此祖制也前

太子冠禮凡三加初折上中二遠遊冠三九旒冕前

明進士賜瓊林宴畫席上七盃水南翰記

水南翰記內諸司舍屋惟秘閣最宏壯閣下穹隆高敞謂
之水天

永樂辛丑北京大內新成勅翰林院凡南內文淵閣所藏
古今書籍各取一部送至北京餘收貯封識如故時修撰
陳循如數取進得一百櫃督舟載以進京至正統己巳南
內災文淵閣向所藏書悉為灰燼姚福青
溪暇筆

元時有只孫衣周伯琦詐馬行序曰華元一色衣也周憲
王元宮詞健兒千隊足如飛隨從南郊露未晞鼓吹聲中
春日曉御前咸着只孫衣吳郡皇甫庸近峰聞略云元親
王及功臣侍宴者別賜冠衣謂之只孫今議從所服團花
只孫當是也按元史世祖本紀只作質

劉瑾用事時百官門狀啟禮悉用紅紙京師紙價十數倍

雖元臣宿將必自稱晚生及門下生近峯聞略

宋制科先命從官各舉平生所為文五十篇於學士院中
選而後召試明弘治癸丑以前凡選廢吉士必先期呈所
為文于內閣謂之投獻猶有宋制科遺意後廢不用近峯
聞略

明朝年號犯前代者涼張重華五代蠻張遇賢宋方臘皆
稱永樂元武宗太子阿速急八即位改元天順宋夏主李
乾順稱正德正德改元詔下馬冢宰試選人題曰宋相須
用讀書人論改用宋太祖事譏內閣也
太祖于後湖中築一臺藏天下兵冊避火災也築屢潰乃

命囊所誅髑髏為基臺即就此洪武三年事也

徐楨卿剪勝野聞

京師稱謂極尊者曰老先生自內閣以至大小九卿皆然門生稱座主亦不過老先生而已至分宜當國而諛者日衆甚者稱夫子此後門生稱座主俱曰老師又有無故而稱老師者不可勝記觚不觚錄

六年一京察乃成化以後定例至于考察科道則或以輔臣去任而及其黨者惟嘉靖丙辰因星變命輔臣李本昂本掌部事悉取六部九卿自尚書至尚寶丞及六科十三道分別去留之蓋分宜借此伸其恩怨也隆慶四年有旨命吏部高拱考察科道官高請與都察院同事大者削小

者謫其後高雖敗而斥者不復用

左右春坊中允入閣門內揖出用雙導贊善亦然而翰林侍讀侍講品故同中允然以本院屬官故揖則中庭出則單導獨至修書講筵主兩京試則皆誦讀先而中允後此衙門故事也明萬歷己卯南京鄉試忽以中允高啟愚先而羅萬化後成法為之一變本朝各省鄉試翰林科員同差者必翰林官為正而科員副之康熙甲子陝西鄉試江都許承宣以工科為正主考錢塘汪霽以編修為副亦一時變例也

分宜當國家人永年專為世蕃過錢署號曰霍坡江陵當

國而家人子游七司其出納署號曰楚濱一時士大夫無不稱崔坡楚濱者觚不觚錄

私鹽之禁至今日嚴密極矣嘗記宋時漕運自荆湖南北未至真揚交却舟人皆市私鹽以歸每得厚利故舟人以舡為家一有損漏旋即補葺久而不壞運道亦通明文皇帝嘗謂侍從曰篙工柁師有少販鬻但無妨公不必究問其寬大如此今之盤詰私鹽者糧艘亦在不免犯者無論運官運丁一體治罪又加以閩吏之權征真無纖毫餘利以惠窮乏宜其計無復之侵蝕官米也

明朝開科始洪武三年而定條例自十七年始先是試文

尚仍元制二十一年始刻程文先是止錄姓名鄉貫試錄定式自二十四年始陳萬湯志

正德戊辰廷試二甲三甲一名各刊策丁丑會試五經各刊文三篇皆異常格

許襄毅公進成化中以御史丁憂起復上京惟乘馬其配高夫人素病眩暈不能御車亦騎而從竟不索轎時仲子司徒誥方在襁褓叔子少傅讚娠在腹而司馬論則其季也

分宜當國時有一檢討家居十九年既至與分宜抗禮上坐用侍生白單帖分宜亦不為異蓋衙門稱晚生惟七科

前輩不論入閣與否又新進者于掌院學士稱晚生避馬
馮夢楨快雪堂漫錄

殿試臚唱畢禮部堂上官捧黃榜鼓吹導出大清門一甲
三人隨之餘進士則仍自兩旁門出此定制也康熙庚辰
科閣臣孝感沁州以本科會試總裁復充殿試讀卷官榜
眼季愈探花王露皆其禮闈所取前列士對策書法大不
滿上意是日捧榜止用禮部司官而一甲三人俱不敢由
中門出此後遂相沿不變矣

康熙庚辰二月禮闈舉子場事已竣方鎖闈閱卷二十日
夜明遠樓上忽有啼聲視之乃一初生嬰女不知所自來

外簾官相顧愕貽以其事近恠不敢上聞越二日進呈五
魁卷隨令一役送此女置育嬰堂中明日有人抱之以去
後余至育嬰堂親問李老人果有此事亦人妖也

庚辰四月十七早東直門已啟鑰而門扇窄合不可開若
有物錮之者自卯達申内外出入不通壅擠者數千人司
門兵役奔告九門提督以羊豕致祭戶樞旋開已近黃昏
矣

庚辰五月初十以後太白經天在張翼二星之間日斜乃
見非晝見也

自鄭州至雄州一帶春夏之交雨水泛濫行者病涉恒以

為若按蘇子田使契丹時有贈知雄州王崇極詩首章云
趙北燕南古戰場何年千里作方塘烟波坐覺胡塵遠皮
幣遙知國計長又云城裡都無一寸閭城頭野水四行漫
與君但對湖光飲多病偏須酒令寬則北宋時此地已為
澤國當時引浚灤諸水以限戎馬之足遂成巨浸積漸使
然也

本朝禁中宮殿門名大概仍明之舊與酌中志所載畧同
乾清門之內為乾清宮之東曰昭仁殿西曰弘德殿東
宮及諸王讀書之所一在門之東曰東書房一在門之西
曰西書房皆北向翰林院直廬曰南書房與西書房纔隔

一垣循西廊稍北曰翻書房在月華門之南月華門北曰
懋勤殿乾清宮正北曰交泰殿交泰正北曰坤寧宮之有
東西二煖殿坤寧宮直北曰欽安殿又北為御花園神武
門自昭仁弘德而北兩翼相比者東曰延禧宮承乾宮景
陽宮景仁宮長春宮鍾粹宮西曰翊坤宮永和宮咸福宮
永壽宮啟祥宮儲秀宮御茶房在乾清宮東北御書房古
董房俱在景陽宮內敬事房在景仁宮內中正殿在長春
宮之西又西為咸安宮天穹殿在景陽宮之東以上皆宮
門之內
乾清門之東曰內左門西曰內右門北下東向者曰日精
門昭華門基化門景和門近光左門西向者曰月華門端

則門隆福門近光右門月華門之外曰隆宗門之西曰
養心殿南曰慈寧宮太后所居景和門之東為毓慶宮皇子宮
也又東為寧壽宮皇太后所居此外尚有兆祥所遇喜所內
永安亭南府西路南府中路東庫房西庫房鷹房大小狗
房鳥鎗房鴿子房裱房藥房露房等名皆不在宮殿之數
本朝內監數目 乾清宮 總管二首領四太監十九打掃首領三打掃太監七十八
昭仁殿 首領二太監七 弘德殿 首領二太監七 懋勤殿 首領一太監六 自鳴鐘下
太監四執事 首領四太監十六 御茶房 首領二太監四十六 上乘轎 首領二太監三
坤寧宮 首領二太監十 東煖殿 首領二太監五 西煖殿 首領二太監六 寶房即
交泰殿 首領二太監四 延禧宮 首領二太監十四 長春宮 首領二太監十二 永壽

宮 首領二太監 翊坤宮 首領二太監十三 永和宮 首領二太監十 啟祥宮 首領二太監十
二太監 承乾宮 首領二太監十 咸福宮 首領二太監十七 儲秀宮 首領二太監十
四景陽宮 首領一太監七 鍾粹宮 首領二太監十 景仁宮 首領二太監十 近光左
門 太監 御書房在景陽宮內 首領二太監九 古董房在景陽宮內
首領二太監 東書房 太監 南書房 太監 諸王子書房 太監 西書
房 太監 翻書房 太監 敬事房在景仁宮內 首領一太監 御前
太監讀清書 太監 乾清門 首領二太監十一 日精門在東宮 首領二太監
五 月華門在宮西 首領二太監六 內左門 首領二太監十一 內右門 首領二太監
十 景和門 首領二太監六 隆福門 首領二太監五 基化門 首領二太監八 端則門
首領二太監 昭華門 首領二太監八 近光右門 太監 養心殿在月華門
太監六

外正西 監十五 打掃首領二 太監八 箭匠五 太監 按摩五 太監 錠匠
二 太監 學西洋醫 太監 畫匠一 太監 鳥鎗八 太監 養心殿露房 太監
三 裱房 太監 領一 大殿 鷹上 首領二 太監 大狗房 首領二 太監 九 鶴
子房 太監 御花園在欽安殿後 首領三 太監 北小花園在宮
後 首領二 天宮殿在景陽宮東 首領二 中正殿在長春宮
西 太監 欽安殿 首領二 太監 熟火房 首領一 太監 柴炭所 首領
五 監十 燒炕 首領二 太監 兆祥所在神武門內 首領二 書房 監
四 遇喜處 首領二 所內 總管一 首領九 永安亭 首領三 太
南府西路 首領三 太監 南府中路在瀛臺南 首領二 南薰殿
在內西華門內 首領一 太監 咸安宮 首領二 太監 慈寧宮 佛堂
監二 十五 太監 三十二 太監

二 太監 六 喇嘛 首領二 太監 廿二 諷經 首領二 太監
十一 管門 首領二 太監 十 花園 首領二 太監 二 打掃
首領二 打寧壽宮在毓慶宮東 太監 數 毓慶宮 殿上 首領
十 鷹上 首領一 太監 十一 門上 首領一 太監 八 狗
房 首領一 太監 廿四 執事 首領二 太監 十六 茶房 首
領二 太監 十七 鳥鎗 太監 十五 睿前 太監 十三 阿哥下 太監
五 打掃 首領一 太監 十五 阿哥下 太監 十六 阿哥下 太監 東
十四 阿哥下 太監 十五 阿哥下 太監 十六 阿哥下 太監 東
庫房阿哥下 太監 西庫房阿哥下 太監
三月初旬榆莢方生時官廚采供 御饌或和以粉或以
麵內直詞臣每蒙賜食余有詩紀之
湯山在昌平州東南山下有湯泉 行宮在山之東跨泉
為浴池癸未五月隨 駕駐此偶閱曹能始名勝志云温

泉出昌平西北二十五里之湯峪初疑志訛是日作詩因
詳注此段進呈明日 上賜御札云此湯非舊有康熙二
三年間輔臣時人始知之病者浴此甚有益昌平州西北
湯峪之泉故在非志訛也 御札隨繳進謹錄于右以見
皇上之精于考證如此

古北口外有老樹根為沙水浸潤歲久發光以刀削去薄
皮肌理瑩徹大者合把小如臂指皆透明如琉璃水精夜
置暗室中照見細字因呼為夜光木出水半月後濕氣漸
乾光亦漸滅成枯槲矣真物理之莫解者此樹亦不知名
猴頭蘑菰產鞍子嶺附近山中大者一枚重斤許味厚如

榆肉而鮮美過之元陽允孚藥京詩更說高麗生菜美總
輸山後磨菰香自注云尖山產磨菰按元之藥京去此不
遠物產正同又有一種生牛馬糞堆者名沙菌亦可采食
但形味差薄耳

山中有野杏樹枝幹多被野燒所焚其根堅韌入土不爛
有花紋而香以為筆架及小香几玲瓏可愛御前俱斷用
之余受 賜者用作小架鏡名之為蟠木
去熱河九十里入蒙古科爾沁界其地有湯泉 上坐湯
回諭諸臣云朕坐湯凡二十二處所至必令西洋人以銀
盆盛水重湯煎之俟水乾驗盆底或硫或硝或鹵或砂各

各不同至其舒筋骨和血脉則一也

蒙古阿巴海部落地名充俄里有泡子河產天然鹽生水中如層冰厚四五寸許鑿取成磚不事煎熬而可食其味較中國食鹽稍澹又有產於高山者彌望如雪人跡不能到則用強弓仰射取之又產精鐵色如白銀今上用鳥鎗皆采此鐵製造往聞明季嚴禁關口不得出鹽鐵等物謂可坐困外國豈知彼中物產固自不乏耶

口外避暑行宮

皇上取樸素之義命曰山莊自兩間房

起次鞞子嶺次黃甲營次樺榆溝

相近有釣魚臺亦有樓閣然非宿頓次喀

喇火屯蒙古云喀喇譯云黑色其地本名黑城亦云烏城

次上營子一名熱河次藍旂營次波羅火屯一名黃姑莊其地與蒙古四子部落相近次唐山營凡九處宮殿之制繪圖如一惟喀喇火屯地形寬衍溪山尤勝行宮之後復創苑囿黃甲營向係腰站殿宇無多駐蹕歲不過一宿而已

塞山有毒草中人肌膚毒甚蜂蠆自唐山營踰汗鐵木嶺而外徧地有之俗名蠟子草蘆高四五尺葉如麻嫩時可供馬秣經霜則瘁螫不可觸

椒樹葉與烏柏相似而大如團扇有鉅齒初生時可裹餅餌蒸食霜後鮮赤若丹楓照耀岩谷其皮柔韌如蘇皮烏

喇之人采以治繩作魚網入水不濡又可為烏鎗火繩中國所無也按本草人參條下所載椴木音賈而此音斷不同

細鱗魚產灤河中旁近溪澗多有之重唇鱗如魴中有黑斑大者一頭重斤許味極鮮腴又有柘綠魚味與細鱗畧同而形差小又有柳浪魚長不過二三寸入釣最多竿不虛舉此魚族聚緩流中好食柳眼故名

駱駝有紫色白色兩種蒙古與中國貿易臆健者每頭值價二三十金以其卧而斂草腹不貼地故曰明駝行圖駐蹕之所擇地勢平行者刈草剗土測景向正南中

立帳殿外設幔城以黃布為之開東西南三門幔城外四面又設網城一重羽林周廬環繞網城之外相去率百餘步惟內廷扈從詞臣設帳房于南門三十步內以便不時宣喚也

烏喇柰山果也一名斨李叢生樸檉間紅如珊瑚比櫻桃而大味甘微酢蜜浸可以致遠蒙古諸山處有之玲瓏山溝口蒙古名為生濟圖大羅昂阿有水不詳其名源自白旗營流下塞外諸川此為最大商人伐巨松成段散置斯干遇暴雨水漲則順流而出以道里揆之當亦達于灤河從永平南入關者

雍安嶺塞外諸山最高處嶺上多白沙故名其山東連長
白西界五臺嶺下為東四旗舊營外即蒙古克什黑屯部
落北去百餘里直走旱海矣或云此嶺之北即陰山恐未
必然嶺上喬松挿天不計其數葉短而勁八月杪被霜黃
落與凡材無異名落葉松蓋茲山下臨沙漠朔氣高寒宜
無不凋之木也

黃羊興安嶺上獨石口一帶草中有之高三尺餘背毛淺
黃色腹下白百十為群每合圍遙望拍々如鶩鴨所得以
千計有耳無角尾似麇聲似麇本鹿類而以羊名之本草
謂黃羊狀與羊同腹下帶黃色者猶未得其真也

虎有威骨長寸餘在脇兩旁肉中不附筋骨初生時骨平
如一字年深則曲而為乙字其力始猛所謂虎挾乙也東
宮行圍時曾以一枚見賜後以與李氏外孫女云可辟邪
野猪毛深黑色高五六尺長八九尺絕有力上下四牙長
出口外人莫敢撻弓矢不能勝利用火攻味之美尤在皮
行廚以供上膳非拜賜不得食
熊之力大于虎倚樹而立獵者不敢近必先以狗撩之俟
其出林然後人力有所施鎗箭競如其計無復之則騰身
上喬木之杪拗樹枝以擲人々以火器仰攻力盡乃墮有
猪熊人熊馬熊樹熊石熊之別余所見者乃石熊也本草

云背上脂為熊白味甚美不知腹中之腴拌糖霜皆可生食也

大凡打圍惟在得鹿他如豺狼狐狸諸獸圍未合時往多竄者出鹿之類不一十麋麋中纔得一鹿十牝鹿中纔得一牡鹿牝無角而牡有角老鹿之角有長至丈許者此為絕有力箭已洞背貫腹負痛疾馳尚能踰險越阻行數十里乃斃白露後秋分前極肥過此漸羸瘦矣
哨鹿之說遼史已有之但未詳其法今特志之每歲于白露後三日獵者衣鹿皮戴鹿頭天未明潛伏草中吹木筒作聲牡鹿聞之以為求其偶也遂踴躍而至則利鏃加

馬無得脫者

鹿茸初解角時其長如繭栗蒸而食之嫩如乳酥色白而微紅余陪獵三回僅得一嘗香味兩奇絕世謂江瑤柱食品無對惟此可與相匹

獵場草深沒馬腹山雉最多而肥驚人決起高飛不能及遠旋復入草中從行者往下馬徒步取之易如拾蚌蛤每日暮回營人馬後必帶數尾以供晚食間有飛入帳房中宴坐而獲者重陽以後瘦不中食亦如鹿過秋分則羸時候使然也

飛狐本蝙蝠之類毛深褐色銳頭缺口似兔而長尾之長

與身等肉翅如鱉裙四足生翅中前足四爪後足五爪能
飛不踰尋丈 上于必忒舍勒園中親射得之

塞山積兩草中產蜥蜴長四寸許頭以下色如翡翠有紋
勻細如魚鱗尾作泥金色吐氣為雲喀喇火屯一帶
有之土人呼為雲虎

千年老松癭剖之作瓢可貯水一二升許又落葉松根出
菌芝莖紫赤色皆可充几案間物避暑時 上嘗班賜扈
從文臣余所得二芝一瓢他日可為初白菴中清供也
順風耳西洋巧工所製以銅為管節々相續約長丈餘如
千里鏡之式虛其中口大而末小向空中傳語自上而下

或自下而上相去五六里聲息相聞此器亦從古所未有
殺虎時往々用之

一日 上在行宮出示石子二枚其一黃白色形圓中空
貯水映日則見其一紫色中有水一滴如唾珠隨手轉換
石面上向則珠反下走石下向則珠却上升循環無端疑
即空青之類本產蒙古山中而彼不知貴也

塞外有山果名烏沙兒契深紅色味似烏喇柰而微苦核
扁如瓜子其枝大者可為弓幹細者可為箭筈亦材木也
本草不載

戶部西庫中有書五十厨康熙癸未九月杪奉 旨着養

心殿供奉向庫中檢查僅得三吳水利考及蔡忠惠文朔
州集共三種據面奏云此外率殘闕不全吾不敢信也
癸未十月初五日殿試武舉黎明傳 旨南書房先後隨
駕翰林少詹陳元龍諭德查昇陳壯履編修汪士鋐錢名
世庶吉士汪灝查慎行蔣廷錫八人俱着隨往紫光閣看
武舉校射余輩隨赴西苑候 駕已刻 上乘舟至先率
東宮諸王各射步箭一回然後陞寶座讀卷官自大學士
至少詹共十四員于幄殿東南西向坐余輩八人以次班
坐于後申刻武舉一百人馬射既畢諸臣移坐東向復觀
武舉步射每十人為一朋每人射畢又各試技勇甫三朋

日已下春 上率東宮以下又射箭一回乃回宮明日午
後校射始畢選十三人充 御前侍衛吾宗三百年來未
有登武榜者是科族叔靜安始冒朱姓成進士余與聲山
名不在讀卷之列蒙 恩得坐班與觀亦一門盛事也
每年十一月初一日宮中始燒煖炕設圍爐舊謂之開爐
節十二月二十四日乾清宮廷前設萬壽燈八仙望子四
架二十六日各宮殿門俱掛門神對聯二十八日宮中及
甬道西兩廊俱設五色羊角燈此歲例也
壬午十二月二十三日各衙門已封印兩日矣忽有 旨
召各省新授督學入南書房候考 御試題夫子循々然

節制義一篇奉和 聖製為考試嘆五律一首午後呈卷
明早復集內廷俱依擬用人 賜御書一幅而出所用十
一人翰詹衙門計十人部曹止一人乃翁嵩年康飴也自
是翰林院官頗為諸曹所忌蓋舊例除北直江南浙江三
省學院而外其餘各省學道多以部郎及外府俸滿進士
出身者充之今一變其局疑有他故其寔出自 宸斷與
在廷無與也

元旦宮廷內外朝儀五鼓 駕親祭堂子各官俱朝服于
午門外送迎黎明 駕回宮先自奉先殿繼至寧壽宮行
禮畢然後乘輦出 御太和殿受外廷朝賀辰刻復回乾

清宮庭前樂作 上陞寶座垂簾樂再奏宮嬪于 上前
行禮樂三奏簾捲東宮諸王以次在殿庭行三跪九叩頭
禮樂四奏公主郡主于宮中行禮樂五奏 上御西暖閣
內外諸臣齊集午門內望毓慶宮行兩跪六叩頭禮 畢
始散班

暢春苑向未有直廬供奉之員皆就近僦居以候不時宣
喚康熙癸未正月余與汪紫滄家聲山三人隨 駕赴苑
上親指小東門內沿牆向西屋五間為祇候之地其秋改
作三層南向而以直南三間為翰林直房後二層為画苑
自是入直有定所與南書房同

西苑張燈自正月十四夜起至十六夜止癸未上元前二
日有 旨查昇查慎行汪灝自明日為始連夕俱至西廠
看放烟火至十四日酉刻內侍一人稟余輩三人自小南
門入沿河北行里許經勤政樓下穿網城西渡板橋寬數
百畝壤平如削當樓之正面設燈棚一架高起六丈餘稍
南為不夜城中列黃河九曲燈縛秫秸作坊巷衙衙徑街
迴復徃々入而易迷燈之數不知其幾每一燈旁植一旗
五采間錯日初落數千百燈一時先燃其北列柵方廣約
五六里散植炬火數百架黃昏 上御樓西向坐先放高
架烟火謂之合子最奇者為千葉蓮花合子既畢人氣尤

靜須臾橋東爆竹聲發藥綫從隔河起飛星一道倒曳有
聲倏止倏下入列柵中縱橫馳突食頃火光遠近齋著如
蟄雷奮地飛電掣空此時月色天光俱為烟氣所蔽觀者
神移目炫震撼動搖不能自主移時烟焰盡消而九曲黃
河燈猶熒々如繁星也內官舞龍燈者至樓前伺候余輩
乃出宮漏下二鼓矣十五十六兩夜皆然其後歲以為例
但取道苑北門不復從南門入矣

進士釋褐例在國子監柏樹下康熙癸未因修葺太學工
未竣先師先賢牌位俱移度順天府學新進士即于府學
行釋褐禮一甲三人入大成殿分獻余與紫滄分獻兩廡

再行三跪九叩禮然後赴彞倫堂謁大司成行四拜禮畢
登堂就席一甲三人在中間授庶常者在東間餘進士在
西間各飲三杯揖司成而退

上留心醫理熟諳藥性嘗諭臣等云聖賢道理俱有一
定之論至于醫卜星相言人：殊世間庸醫于寒熱虛實
率未能辨南人喜用補北人好用瀉皆非適中之道大抵
溫補之藥其效甚微酷烈之藥其效立見方書所載湯頭
甚多若一方可療一病何用屢易西洋有一種樹皮名金
鷄勒以治瘧疾一服即愈可見用藥只在對症也
養心殿送到萬首唐人絕句一部真南宋本前有洪容齋

序紹熙元年刻于越州蓬萊閣初止四十卷既而容齋歸
鄱陽續刻成書遂滿萬首之數每一卷計詩百首共一百
零一卷紹熙三年奏進重華宮壽皇稱其精博賜茶一百
鞞清馥香十貼薰香二十貼金器一百兩邁復上表謝恩
前後劄子奏狀俱載卷首至嘉定癸未新安汪綱守越遂
搨鄙本并刻之今此本即嘉定中合刻者但檢對目錄現
存僅七十五卷缺二十六卷為可惜耳

經筵舊例先五日掌院學士擬進四書二條尚書易經各
二條候御筆點定講官始撰講章再經繕清進呈臨時
備用甲申春將舉經筵掌院所擬題概置不用經書二條

皆出 上裁四書子貢問政一節尚書汝二十有二人欽
哉惟時亮天工二句二月廿九日午後方發下是月漢誦
官為華亭王大司空吾邑陳正詹倉卒撰擬為期甚迫三
月初二日黎明 上御文華殿進講畢賜茶而退經筵例
有筵宴停止自茲始

御前發下白玉引首圖章一枚篆文廣仁殿三字奉 旨
旨考究出處記得金史章宗泰和七年召對羣臣于廣仁
殿又查禁扁目錄金初都燕後移汴宮殿扁額亦載有廣
仁殿之名但剏造年月則無可考

唐伯虎相城水村圖画卷宣紙小幅濶纔半尺長六尺餘

水墨濃淡點綴生動楊柳共三十四株江橋村市出没水
氣中後有王文恪公五言古詩一首伯虎次和最後又有
盧裒次韻一首相城沈石田所居時石田下世文恪與伯
虎往弔舟中作此一時興會所到筆墨之痕俱化平生所
見伯虎画此為第一甲申五月十五日 御前發下裝潢
裱房在西苑直廬之後與王麓臺前輩同觀

皇上精于算學常著三角形論以示內廷諸臣茫然無有
解者一日面示臣等算法先聚米一堆于案上用軟尺量
之圍五尺三寸五分徑一尺七寸高五寸三分積數得四
千〇〇九寸復以堆垛法一百二十五寸除之得三二〇

七之數隨用一百二十五寸之銅斗量之不差累黍又頒
示一寸斗一八寸斗一十八寸斗一斛水于中大小隨其
所受寸之而積盈縮不爽 御筆推算法一紙今存家少
詹姪處

嘉量算經三卷律呂正論六卷明鄭世子載堉著其書推
原造歷之本大約謂古人以度定量以量定權必參相得
而後黃鐘之律可求律與度量衡相須為用非度量衡生
于律也因將累黍推定三器並歷代沿革損益著之于篇
此書世不多有御府曾見之按鄭世子之父恭王被誣禁
高墻世子不敢居內寢築一室王門外席藁以居與王居

高墻之年等後恭王薨世子遁之山中讓爵于盟津王之
子見 有子滅季札之風

御園蒲桃凡十種甲申十一月十三日頒賜南書房諸臣
御製詩云休誇大宛貢莫咲漢宮傳十種標名異千條帶
葉鮮隨班命內侍分賜到諸賢飽食和心胃歸鞍賦木天
此詩原薰存家聲山學士處十種者一伏地公領孫二伏
地黑蒲桃三伏地瑪瑙四喀蜜公領孫五哈蜜瑣六蒲桃
六哈蜜綠蒲桃七哈蜜紅蒲桃八哈蜜白蒲桃九哈蜜黑
蒲桃十馬乳

除夕前三日內廷日直諸臣人賜全鹿一隻風羊二隻兔

八隻野鷄八隻鹿尾四枚關東大魚八尾黃封酒二壘此
年例也甲申十二月加賜御書徑尺大福字一幅對聯
一副綠石硯一方歲不為例

內府收藏書畫余在內廷曾經眼見者不計其數今錄其

尤妙者共三十五種以脩遺忘絹本小楷曹娥碑後有昌

二跋又宋高宗跋書澄心紙上又謝端宋本喬簣趙子昂

成三跋又虞集前後共十跋今上御題跋一鵲華秋色圖絹子宋箋高六寸長六尺楷書九行褚河南

西昇經樂毅論楷書墨蹟不書張澤端清明上河圖卷

子絹本長燕文貴做王摩詰關山雪霽圖卷郭熙蜀山

積雪圖卷趙子昂百駿圖卷右軍黃庭經小楷卷唐人

臨本朱芾山水卷陳所翁九龍圖趙千里後赤壁圖卷

黃筌設色花卉吳彩鸞細楷唐韻顧野王草虫卷

閻立本步輦圖閻立本洛神賦圖燕文貴長江萬里

圖卷劉松年江上雪霽圖東坡墨竹虞世南廟堂

碑真蹟黃公望江山勝覽圖卷宋僧牧溪果蔬烏雀

圖卷錢舜舉白雲紅樹圖趙千里大禹治水圖卷首

王穉登八分後有徐熙鈎染花卉翎毛長卷唐六如水

村圖管夫人白描大士像唐陸東之書文賦真蹟

劉松年五百羅漢卷趙雍畫馬有董其昌跋李龍眠白描五

百羅漢卷李北海大照寺碑真蹟周昉美人沉月圖

黃子久秋山雨意圖

後有元人李忠倪贊二跋

龍蝦產閩廣海中長丈餘通身十七節頭似龍有角脚長數寸須上有毛白如玳瑁尾五株皆倒捲韓昌黎詩云又嘗疑龍蝦果誰雄牙鬚乙酉正月初四日在南書房上遣內侍傳示始見之

乙酉八月杪園場既撤駕自興安嶺一帶巡邊入張家口廿八日駐上都必拉廿九早沿路閱視群牧先諸王子馬群次正藍旗次鑲白旗次正白旗其餘各旗牧地稍遠不及趕赴自上都必拉至諾海和碩五十里間駝馬牛羊彌望不絕皆數年中賜種孳息者每位諸王下馬駒二千餘

匹八旗每一牛錄有馬一千二百匹餘蓄產稱是三十日早發諾海和碩先閱鑲黃旗畜牧次閱太僕寺官馬駒一萬三千餘匹上沿途緩轡選其駁異者歸上駟院計程七十餘里抵塔班托羅海駐蹕九月初二日自烏蘭腦兒至查木哈兔腦兒閱視慶豐司羊群計二十六萬頭入東宮監牧四萬頭共羊三十萬初三日閱視牛群約十萬餘是夕駐託里渾腦兒初四日閱視上駟院馬駒每群以毛色為別白者青者黑者紅者黃者紫者雜色者散布山岡望同雲錦為數約二十萬四十里抵昂烏力海巴拉漢典牧官員屯聚于此過此六里駐蹕初五日 上御幔

城南門觀調生馬先賜南書房翰林官馬八疋次賜隨駕
總兵副將各官人各馬一疋初七日至西巴里臺上諭
云此間尚有上駟院馬二十一群向經調習者每年春夏
放青九月歸厰今歲因朕巡邊恐馬力疲乏留備更替故
不令趕來上又諭云明朝養馬大累民間我太宗時以
獨石口至張家口山北一帶水草肥饒指為放牧之地今
歷數十餘年孳產蕃息既不累民亦不費官自古馬政之
善無如本朝者

自興安打巴漢三十里至渾秦布拉噶五十里都倫那拉
又名上都海拉思台四十里庫勒班庫特勒四十里額勒

屯色欽六十里博羅活屯上都必拉五十里諾海和什七
十二里塔班托羅海五十里烏蘭兒腦五十里查木哈兒腦
兒四十五里托里渾腦兒四十五里昂烏力海巴拉漢五
十五里哈木虎布兒喀四十里西巴里台十五里察罕托
羅海二十里陀羅寺三十里張家口五里下堡城六十里
宣化府十八里泥河十里鷄兒梁響水鋪二十里上花園
十里下花園鷄鳴山十里鷄鳴驛十五里新保安二十五
里沙城二十里土木驛三十里懷來縣有廣慈寺二十五
里榆林堡二十五里全道五里八達嶺三里青龍橋三里
石佛寺二里彈琴峽五里居庸北關十五里南關二十五

里大頭六十里暢春苑共二十二點計程一千零八十三里
張家口內保安沙城一帶地產沙蓬實如蒺藜中有米如稗子食之益人本草所不載
蓋草一名萊亦名王芻本草云此草綠色可染黃古者貢草入染人故謂之王芻詩經蓋臣取進忠之義當本此
乙酉十月六科缺員奉 旨將翰林院編檢改補初四日
掌院學士啟奏考選日期南書房翰林及日誦官俱着一體開列余與張衡臣錢亮功蔣揚孫四人時在直廬奏乞免開職名不願改授言路奉 旨俯允初六日召見翰林

官廿九員用王懿史申義鄭際泰管灝陳允恭周道新楊顯張大有李紹周九人蓋向來科道員缺例以庶吉士出館而未授職者挨補今已授職復行改用似以臺垣為編檢陞缺惜此語不敢 上奏也此例開自庚辰在本衙門為疏通之路而編檢品秩稍降矣
會試總裁歷科以來二正二副例用四員丙戌會試止用李少宰錄子彭少司空會洪二人先奉 嚴綸戒飭放榜後為浮言所中會元尚居易以文體不正黜草殿試榜發黜落者四人罰科者十一人奉 旨將會試總裁及房考三人交都察院議處俱落職南宮變局也

丙戌四月朔庶常當散館 上在西苑考試滿漢庶吉士
三十八人 御賜題存心養性為匪懈論一首賦得人盡
農桑力五言排律十二韵余與錢亮功汪紫滄蔣楊孫四
人先經授職不復與考初六日 命下留館授職者止十
五人其餘再行教習者二十人草職者三人兩掌院俱降
三級留任視癸未又加嚴從來殿試進士以館選為榮極
盛必衰固其理也

每科選館 皇上御保和殿滿漢大學士於煖閣內站班
掌院兩學士立煖閣下西向一甲三人排立掌院後諸進
士以次分班唱名每十人為一班由殿東入跪奏姓名籍

貫及鄉會試名次選館者留殿中與昂甲挨次立唱名畢
諸大臣各賜茶 上升輦回宮此定例也丙戌四月二十
六日 上不入朝即于西苑澹寧宮舉行此典新進士二
百九十餘名俱從東南奏事門入 欽點庶吉士共四十
八人浙江九人吾季弟潤木與烏先是癸未科余授庶常
時仲弟德尹以編修在殿門坐班今日余在苑門復見季
弟館選兄弟三人八年之中俱備員詞苑不可謂非一門
幸事也

口外草木可當茗飲者有三種一種紅蓼花根蒙古呼為
色都滿洲呼為色爾布一種即落葉松皮一種名奢木子

亦名瓜子兒茶其色紅

口外有一種草長尺餘六月開花似虞美人而重臺淺紫色每本三極結子如桑椹因地椹壓其漿熬成膏點湯飲之味極芳甘盛以玻璃杯色尤可愛

山莊九處黃甲營地稍窄餘八處多有直廬在行宮三門內東朵殿之後平屋三間西向庭前設松棚以禦暑扈從詞臣每黎明入直一如在西苑也其樺榆溝喀喇火屯土營子三處隨駕大臣皆賜官房為止宿之地大抵皇
上清暑六七月之交于三處駐蹕為多故詞臣亦得受廬
兩人共住三間紗幪木榻用此風日過此以往率就草地

支帳房與羽林列幕者無別矣

從烏喇哈帶東行四十五里地名阿赤你巴蒙古謂兩山
交會處也又自北而東渡一溪行十里許有柴柵茅屋又
東二十里渡西兒哈溝為岳七利台吉營盤所居新剋瓦
屋四層環以土牆旁有喇麻寺亦用瓦蓋上初幸其居
後移住幔城岳七利者翁牛特部落貴人也又東北行二
十里為坤維火羅又東為巴顏打巴漢上下約二十餘里
嶺下即翁牛特部落駐牧之地其地舊名嬰阿今改名巴
顏爾賚平壤一區清流貫其中四面山勢環拱如城郭時
八公主下嫁于都倫郡王瓦殿六重工部官為營建者丙

戊八月初八日 上送公主親至其地向來園場所不到也從此望西北行五十餘里為溪百冲昂阿又西四十餘里為木克帶道旁有湯泉折而南行十餘里乃折而西又十餘里至汗必力阿打巴漢昂阿去白全不過三十里矣丙戌九月十四日自獵場回 鑾駐波羅火屯內侍李玉傳 旨問及每科舉人進士所給水程牌坊銀兩數目余輩回奏云所給銀兩每省數目多寡不一祇就浙江言之新科舉人例給銀四十五兩進士于布政司庫領銀一百兩士子均沾寔惠蓋謂 上意恐被有司侵蝕故有此問也覆奏後復傳 旨云旌表節孝止給牌坊銀三十兩此

項似覺太多遂下部議自後新中進士着于戶部領銀三十兩永以為例裁減牌坊銀數自本科始時會場已過俱照舊例給發一百兩仍行文本省如數扣追 韻府群玉一書元延祐間新吳二陰所集一名時夫字勁絃一名中夫字復春博學而多聞因宋王百祿所增書林事類韻會錢諷回溪史韻等書會粹而附益之洪武正韻初成定為七十六韻洪武八年重刻是書一依新定次序而字下所繫諸事並從陰氏之舊宋景瀛有序今世之所傳者又與明初刻本不同 明月錢見洪遵泉志奇品中徐氏曰此錢文曰明月按此

錢徑九分重四銖二分製作鏤薄形質簡古外無輪郭背
文明徹舊譜所圖與此小異又不載輕重大小計得其名
而未見之也云云壬辰正月余偶從慈仁廟市購得十枚
與泉志所載形模適合明月二字俱篆文但不知鑄自何
代漢以後又無此年號不可考耳

內西華門外西南一里許明朝御用監在焉又南數十步
為真武殿庭前老檜一株下有元時玉酒海承以石牀玉
色青碧間以黑章旁刻魚龍海馬出沒波濤狀口面約廣
三尺餘隨其質為凹凸若荷葉然形製古朴膚理溫潤中
容四五石許壬辰正月十九日借雲間高不騫榭客往觀

摩娑久之按元史世祖紀至元二年十二月瀆山大玉海
成勅置廣寒殿輟耕錄云廣寒殿在萬歲山頂中有小玉
殿內設御榻左右列侍臣坐牀前架黑玉酒壺一車駕歲
巡上都先宴於此燕都遊覽志云今御用監中有小亭
內一玉缸體質頗潤中積水外以朱欄護之即廣寒殿中
物也

李禮南舊無用時所見有李方赤彰煜
印記者將禮南与方赤為一家也

禮南乃方赤又一字蓋永礼
赤璋似禮南方也

八海 記二 卷一 查填 行纂 舊寓 本 一册 百岸 四頁

人海記二卷

查慎行(清海寧)輯 鈔

本一冊

89865

春煥

所